

# selangorkini

PERCUMA

PP 19570/07/2020 (035196)

EDISI 18 - 24 JANUARI 2024

www.selangorkini.my

## Sasar pelaburan RM50 billion

Sasaran tersebut meningkat sebanyak RM5 bilion berbanding RM45 bilion pada 2023. Pertambahan itu juga menjadikan Keluaran Dalam Negara Kasar (KDNK) negeri naik sekurang-kurangnya 0.5 peratus lagi

MUKA 2

### Reaksi 24 jam tangani aduan rakyat

Selaras zaman pendigitalan, penjawat awam perlu beri maklum balas pantas demi penuhi keperluan dan kehendak orang ramai seterusnya pastikan keberkesanan sistem penyampaian perkhidmatan

MUKA 3



Dato' Menteri Besar Dato' Seri Amirudin Shari menyampaikan Insentif Penghargaan Prestasi Kutipan Hasil 2023 kepada Pengarah Tanah dan Galian Selangor Dato' Dr Yusri Zakariah (dua, kanan) berjumlah RM80,000 di bangunan pentadbiran negeri pada 15 Januari 2024. Foto REMY ARIFIN

## pancawarna

### Manfaat daripada bayi hingga warga emas

Belanjawan 2024  
bawa pembaharuan,  
tingkat kemajuan



11-13

### Langkah bijak pacu ekonomi negeri

Pakar puji pentadbiran  
cekap, suntik  
keyakinan pelabur

9-10



### Isu Ashabul Kahfi hanya selisih ungkapan

Utama pengajaran  
kisah kumpulan  
pemuda beriman



15

## Agih 23,900 baucar belanja raya

**SHAH ALAM** - Sebanyak 23,900 baucar Jom Shopping disediakan kepada golongan memerlukan sempena sambutan Tahun Baharu Cina pada tahun ini, kata Dato' Menteri Besar Dato' Seri Amirudin Shari.

Beliau menjelaskan baucar RM200 setiap orang menerusi peruntukan RM4.78 juta diajih kepada penerima yang layak di setiap kawasan iaitu pendapatan isi rumahnya bawah RM3,000 sebulan.

"Baucar ini akan diajih ke setiap Dewan Undangan Negeri (DUN) untuk diserahkan kepada mereka yang memerlukan," katanya menerusi kenyataan di Facebook pada 10 Januari.

Amirudin menambah sebanyak RM16.48 juta disediakan bagi baucar Jom Shopping sepanjang tahun ini meliputi 82,400 penerima untuk perayaan Tahun Baharu Cina, Aidilfitri dan Deepavali.

## Wau kapal jadi identiti negeri

**SHAH ALAM** - Wau kapal yang berciri bentuk jong Melayu diiktiraf sebagai identiti Selangor selepas didaftar di Perbadanan Harta Intelek Malaysia (MyIPO).

Sijil pendaftaran diserah Ketua Pengarah MyIPO Kamal Kormin kepada EXCO Kebudayaan Borhan Aman Shah dalam program Amanat Tahun Baharu 2024 di bangunan pentadbiran negeri pada 15 Januari.

Penyerahan tersebut turut disaksikan Dato' Menteri Besar Dato' Seri Amirudin Shari dan Setiausaha Kerajaan Negeri Dato' Setia Haris Kasim serta barisan EXCO.

Berbeza wau tradisional lain yang berunsur alam dan binatang, wau kapal menjadikan jong Melayu bertiang layar dengan bentuk unik sebagai inspirasi.

Pada November 2021, Borhan memaklumkan wau kapal yang dimainkan sejak turun temurun di Selangor akan diangkat sebagai identiti negeri.

**IMBAS DI SINI**  
akbar digital minggu lepas



## Tengku Amir lawat Pusat Koreksional

**KUALA SELANGOR** - Duli Yang Teramat Mulia (DYTM) Raja Muda Selangor berkenan mencemar duli melewati Pusat Koreksional Puncak Alam pada 16 Januari.

Ketibaan Tengku Amir Shah pada jam 2.30 petang disambut Ketua Pengarah Jabatan Penjara Malaysia Datuk Nordin Muhamad.

Sesi lawatan Baginda bertujuan beramah mesra bersama prospek (banduan muda) dan mengenali le-

bih lanjut mengenai pusat berkenaan.

Pada program itu, Tengku Amir Shah mendengar sembah aluan daripada Nordin dan sembah taklimat oleh Pengarah Pusat Koreksional Puncak Alam Mohd Haniff Che Omar.

Baginda kemudian melawat Sekolah Integriti di pusat koreksional berkenaan dan melihat sendiri sesi pembelajaran kelas tingkatan 1 hingga 5, bilik pengajian tinggi, bilik muzik serta perpustakaan.

Tengku Amir Shah turut menyaksikan persembahan teater muzikal bertajuk 'Bila Anak Laut Berdoa' sebelum ke majlis santapan dan mengakhiri lawatan pada jam 5 petang.

Pusat Koreksional Puncak Alam dibina pada 2009 dengan keluasan 76.6 ekar membabitkan kos pembinaan RM 110 juta sebelum diserahkan kepada Jabatan Penjara Malaysia pada 18 Oktober 2014.

### Turut tingkat peratusan KDNK

## Tambah pelaburan RM5 billion lagi

Oleh NORRASYIDAH ARSHAD

**SHAH ALAM** - Nilai pelaburan tahun ini disasar sehingga RM50 billion berdasarkan perkembangan ekonomi serta pembukaan beberapa sektor.

Dato' Menteri Besar berkata sasaran itu meningkat RM5 billion berbanding nilai perolehan sepanjang 2023 berjumlah RM45 billion.

"Kita yakin boleh capai sasaran RM50 billion. Sekiranya nilai pelaburan meningkat sehingga enam peratus, kita catat minimum kenaikan sehingga 0.5

peratus Keluaran Dalam Negara Kasar (KDNK).

"Mungkin KDNK Selangor mencapai 26 peratus tetapi kita mahu lihat dahulu nilai dicatat tahun lalu. Data jabatan perangkaan belum keluar," kata Dato' Seri Amirudin Shari selepas menghadiri Majlis Amanat Tahun Baharu 2024 di sini pada 15 Januari.

Tahun lalu, Kerajaan Selangor menyasar unjuran nilai pelaburan RM45 billion dengan sektor perkhidmatan menyumbang RM32 billion diikuti sektor pembuatan RM12 billion.

EXCO Pelaburan Ng Sze Han berka-

ta 657 projek pelaburan dalam sektor pembuatan dan perkhidmatan diluluskan dengan nilai pelaburan RM29.72 billion bagi tempoh Januari hingga Jun tahun lalu.

Pada 2022, Selangor turut diumum penyumbang KDNK terbesar dengan 25.5 peratus, sekali gus melebihi satu perempat ekonomi negara.

Pencapaian tertinggi dalam tempoh 14 tahun itu disumbang pelbagai sektor seperti pembuatan, pembinaan dan perkhidmatan apabila negeri ini mencatatkan peratusan tertinggi masing-masing 32.2, 34.1 dan 26.5 peratus.

## Salur lebih banyak dana kebajikan

**KUALA LANGAT** - Kejayaan mengutip hasil negeri melebihi sasaran saban tahun mendorong jumlah peruntukan kebajikan kepada penduduk ditambah, kata Dato' Menteri Besar Dato' Seri Amirudin Shari.

Beliau memberi jaminan kutipan tersebut dikembalikan semula kepada rakyat melalui pelbagai bantuan antaranya program Iltizam Selangor Penyayang (ISP) yang mengandungi 46 inisiatif.

"Sebab itu, Kerajaan Negeri tidak pernah mengurangkan, malah setiap

tahun menambah peruntukan kebajikan dan program kemasyarakatan.

"Kita mahu bantu mereka yang susah, tingkat keupayaan dan semangat dalam kalangan rakyat. Sikap tidak kedekut dengan rakyat bawa limpaan rezeki lebih banyak kepada negeri," katanya.

Berucap dalam perayaan Ponggal peringkat negeri di Kuala Langat pada 15 Januari, Amirudin berkata RM2.7 billion dikutip tahun lalu, lebih RM700 juta daripada sasaran asal RM2 billion.

"Pada 2022, kita kutip lebih RM500

juta daripada sasaran asal manakala 2021 kita kutip lebih RM300 juta dari sasaran," katanya lagi.

Lebih 1,000 masyarakat India menyambut Ponggal di Padang Ladang Sungai Sedu, Banting di sini. Ia perayaan semasa musim menuai yang dirai secara meluas bagi memberi rehat kepada pesawahan dan ternakan.

Ponggal juga menandai permulaan bulan 'Thai' dalam kalendar Tamil dan disambut penyediaan nasi manis untuk keluarga dan rakan tanda berterima kasih atas hasil tuaian yang melimpah ruah.

## Syeikh Dr Ali pemikir Islam unggul

**SHAH ALAM** - Dato' Menteri Besar yakin Syeikh Dr Ali Muhyiddin Ali al-Qaradaghi yang dipilih sebagai pengurus Kesatuan Ulama Sedunia mampu memiliki amanah untuk memimpin pertubuhan keilmuan berpangkalan di Qatar.

Merakam ucapan tahniah, Dato' Seri Amirudin Shari berkata Dr Ali alim dalam pelbagai cabang bidang Islam selain ulama terkenal itu pemikir unggul merentasi pelbagai bidang.

Beliau turut mendoakan Dr Ali yang dipilih majoriti wakil pelbagai negara bagi penggal 2024 hingga 2028 di kurniakan kekuatan untuk memimpin pertubuhan keilmuan berpangkalan di Qatar.

Amirudin juga menjelaskan Dr Ali antara ilmuan yang menyampaikan tazkirah bertajuk Peranan Ummah Dalam Pembebasan Al Aqsa anjuran pentadbiran negeri pada 17 Novem-

ber tahun lalu.

"Dalam pertemuan tersebut, beliau menekankan kepentingan perpaduan ummah agar bumi Palestin dapat merasai kebebasan dan kemerdekaan," katanya di Facebook pada 11 Januari.

Akhir tahun lalu, Kerajaan Negeri mengadakan Majlis Ilmu Selangor Madani yang dihadiri kira-kira 200 jemaah di Kediaman Rasmi Dato' Menteri Besar.



**SEPADAN...** DYMM Sultan Selangor Sultan Sharafuddin Idris Shah Alhaj dan DYMM Tengku Permaisuri Selangor Tengku Permaisuri Hajah Norashikin berangkat ke Majlis Persantapan Diraja sempena Istiadat Perkahwinan Diraja DYTM Paduka Seri Pengiran Muda 'Abdul Mateen ibni Hassanal Bolkiah dan Yang Amat Mulia Pengiran Anak Isteri Anisha Rosnah Adam di Istana Darul Iman, Brunei pada 15 Januari. Foto Facebook Selangor Royal Office

Saran penjawat awam beri reaksi dalam 24 jam

# Tangkas tangani masalah rakyat

Oleh NORRASYIDAH ARSHAD

**SHAH ALAM** - Penjawat awam perlu sentiasa peka dan memberi reaksi pantas terhadap sebarang masalah yang dibangkitkan rakyat seterusnya mencari kaedah penyelesaian seberapa segera.

Dato' Menteri Besar Dato' Seri Amirudin Shari menjelaskan tahap jangkaan orang ramai terhadap keberkesanan perkhidmatan kerajaan besar berikutnya Selangor negeri paling maju di Malaysia.

Katanya, kehendak semasa mendorong tahap kesegeraan meski ia berbeza dengan norma biasa penjawat awam lantaran faktor demografi, latar

belakang penduduk dan pengaruh media sosial.

Berterima kasih kepada kakitangan kerajaan yang membantu meningkatkan hasil negeri saban tahun, beliau berkata perkara tersebut perlu demi memenuhi keperluan dan kehendak masyarakat.

"Penjawat awam perlu melakukan langkah pembaharuan dan perubahan bersesuaian dengan kehendak semasa dan peredaran zaman. Kita sediakan sistem 24 jam tapi sumber manusia tujuh, lapan jam.

"Jadi semua kena bersedia. Kalau tahu malam, sediakan (maklum balas) awal waktu pagi. Kalau boleh jawab malam

itu juga, segerakan sebab orang tidak tunggu," katanya pada 15 Januari.

Berucap dalam majlis Amanat Tahun Baharu 2024 di bangunan pentadbiran negeri, Amirudin berkata perkhidmatan aplikasi berasaskan pendigitalan memudahkan interaksi dengan rakyat.

"Saya faham ada ruang kerja dari 8 pagi hingga 4.30 petang, 9 pagi hingga 5.30 petang. Saya faham itu peraturan sedia ada tetapi situasi sekarang suntuk, setiap perkara mahu disebar.

"Ketua jabatan kalau bercuti atau ada kekangan, perlu ada yang tanggung tugas. Saya tidak mahu alasan waktu kerja sudah habis. Kena pastikan semua dipenuhi dan dipatuhi," katanya.

# Pembangunan semua kelompok

**SHAH ALAM** - Segala keputusan dan rancangan pembangunan negeri perlu membawa manfaat meliputi semua kelompok, bukan hanya tertumpu kepada sesebuah kaum sahaja, kata Dato' Menteri Besar.

Dato' Seri Amirudin Shari menjelaskan banyak aspek perlu diambil kira berikutnya penduduk di negeri ini berbilang kaum, etnik dan kepercayaan sekali gus memenuhi keperluan semua pihak.

"Bukan bererti tidak hormat kepada keluarga atau keturunan tetapi perlu

ada pertimbangan pelbagai kaum, kebiasaan dan kelompok yang ada di negeri ini.

"Semua keputusan berdasarkan etnik sebab Selangor bukan ada 90 atau 80 peratus kelompok tertentu sahaja tetapi banyak, pelbagai latar belakang," katanya pada 15 Januari.

Beliau menegaskan semua pihak perlu memahami perbezaan antara satu sama lain supaya tidak timbul kekacauan atau situasi tidak diingini yang boleh merugikan negeri.

"Kalau kita ikut sentimen yang mem-

buak-buak ketika ini, kita akan kembali menghidupkan perbalahan kaum, menyebabkan situasi yang kita tidak mahu lihat," katanya.

Justeru, Amirudin mengajak semua pihak supaya meneruskan amalan hormat menghormati bagi memastikan keharmonian dan kemakmuran negeri berterusan.

"Kita mahukekalkan keharmonian melibatkan masyarakat berbilang kaum dan tanggungjawab ini harus disedari dari peringkat kaunter hingga pembuat keputusan," katanya.

# Rasmi seragam baharu syarikat MAG

**SHAH ALAM** - Duli Yang Maha Mulia (DYMM) Tengku Permaisuri Selangor Tengku Permaisuri Hajah Norashikin berkenan merasmikan seragam baharu kakitangan Malaysia Aviation Group (MAG).

Menurut kenyataan Selangor Royal Office, Baginda juga menzahir ucapan tahniah atas pembaharuan seragam yang menerap identiti tradisional rakyat Malaysia iaitu elemen songket.

"Baginda juga berbesar hati apabila diberitahu bahawa pakaian seragam baharu ini telah direka oleh pasukan dalaman dan memuji usaha kolektif ini yang mencerminkan dedikasi kakitangan MAG.

"Titah Baginda, seragam bukan sekadar sehelai pakaian tetapi ia juga melambangkan profesionalisme, komitmen dan kebanggaan individu yang memakainya," katanya di Facebook.

# Perpaduan bawa kesejahteraan

**KUALA LANGAT** - Sambutan pelbagai perayaan peringkat negeri menandakan rasa hormat dan kebersamaan pentadbiran negeri dan rakyat pelbagai kaum di Selangor.

Dato' Menteri Besar Dato' Seri Amirudin Shari percaya semangat perpaduan yang diamal seluruh lapisan masyarakat membawa keamanan dan kesejahteraan meski wujud perbezaan budaya.

"Kekalkan perpaduan kerana perpaduan kini menjamin kemajuan, kehidupan baik sekali gus rakyat terjaga dan terpelihara," katanya pada 15 Januari.

Beliau turut menyampaikan sumbangan sari kepada warga emas dalam majlis yang dihadiri lebih 1,000 masyarakat India di Padang Ladang Sungai Sedu, Banting.

# Sedia makmal kaji klon tanaman

**SHAH ALAM** - Kerajaan Negeri akan mewujudkan sebuah makmal penyelidikan dan pembangunan (R&D) bagi menghasilkan kultur tisu tumbuhan terutama klon pisang dan Melon Selangor di Bagan Nakhoda Omar, Sabak Bernam.

EXCO Kemajuan Desa, Perpaduan dan Pengguna, Datuk Rizam Ismail berkata makmal itu boleh menjadi sumber rujukan kepada petani mempelajari penghasilan klon tumbuhan berkualiti dan berhasil tinggi.

Menurutnya, makmal itu dapat memainkan peranan bagi membantu petani bukan sahaja sekitar Dewan Undangan Negeri Sungai Air Tawar malah di seluruh negeri.

"Pembangunan makmal penyelidikan ini adalah yang pertama di daerah Sabak Bernam dan jika ia mendapat sambutan baik, saya yakin ia dapat melahirkan lebih ramai petani moden khususnya golongan muda mencebur teknik pembiakan kultur tisu," katanya lapor Sinar Harian pada 12 Januari.

## Projek tebatan banjir siap 2027

**SHAH ALAM** - Projek Rancangan Tebatan Banjir (RTB) Sungai Langat Fasa 1 dalam proses pengambilan tanah dan dijangka siap pada 2027, kata EXCO Infrastruktur Ir Izham Hashim.

Beliau menjelaskan RTB itu antara projek jangka panjang bawah Tebatan Banjir Berkeutamaan Tinggi (TBBT) melibatkan kawasan tадahan seluas 1,600 kilometer (km) persegi, lapor Bernama.

Katanya, ia meliputi pembinaan ban sepanjang 1.46km di Sungai Langat (Jalan Kajang Dengkil-kolam Bukit Tampoi), struktur inlet kolam Bukit Tampoi dan struktur connecting culvert menyambung dua kolam Bukit Tampoi.

"Turut dibina struktur outlet berserta control gate iaitu menyambungkan kolam Bukit Tampoi ke Sungai Langat, serta ban banjir dan tembok banjir di sekeliling kolam," katanya pada 10 Januari.

Ir Izham juga menambah pembinaan projek RTB Sungai Langat Fasa 2 pula dijangka bermula pada bulan ini dan dijadual siap sepenuhnya menjelang 2030.

Sebelum ini, Menteri Sumber Asli, Alam Sekitar dan Perubahan Iklim Nik Nazmi Nik Ahmad berkata RM725.7 juta disediakan bagi membina RTB demi menyelesaikan masalah banjir di Dengkil sehingga Labuhan Dagang di Sepang.

## Tambah baik mutu jualan murah

**SHAH ALAM** - Program Jualan Ehsan Rahmah (JER) anjuran Kerajaan Negeri disusun semula dengan beberapa penambahbaikan supaya lebih ramai penduduk mendapat manfaat, kata EXCO pertanian.

Ir Izham Hashim berkata perbincangan berhubung pelaksanaan program jualan kendalian Perbadanan Kemajuan Pertanian Selangor (PKPS) itu giat dijalankan dan dijangka selesai hujung bulan ini.

"JER akan diteruskan seperti biasa menerusi peruntukan RM10 juta tetapi kali ini dengan menumpukan penganjurannya pada waktu perayaan," kata beliau.

Katanya, JER akan disusun bersama Program Agro Madani anjuran Kementerian Pertanian dan Keterjaminan Makanan, Selangor Agro Market dan Jualan Prihatin Rakyat kendalian Koperasi Warga Hijrah Selangor Berhad.

"Kita mahu jualan ini diperluas supaya lebih ramai dapat manfaat," katanya.

## Selaras laluan bas, van transit

**SUBANG JAYA** - Pihak berkuasa tempatan (PBT) diarah mengkaji semula laluan Bas Smart Selangor dan menyeraskannya dengan laluan van transit atas permintaan (DRT).

EXCO Pengangkutan Awam Ng Sze Han menjelaskan langkah berkenaan perlu bagi meningkat mutu perkhidmatan pengangkutan awam.

"Kajian ini bagi mengoptimumkan setiap ringgit diperuntuk untuk laluan yang sedang berjalan dengan DRT. PBT akan beri cadangan untuk lokasi bas dan DRT yang sesuai.

"Kita mahu perkhidmatan kedua-

dua ini dapat memanfaatkan semua rakyat di setiap kawasan khusus untuk ke stesen perkhidmatan transit aliran ringan (LRT)," katanya pada 13 Januari.

Beliau turut memaklumkan zon perkhidmatan DRT bertambah tahun ini terutama di Shah Alam melibatkan mahasiswa Universiti Teknologi Mara (UiTM).

"Sambutan menggalakkan seperti di Puchong, kita perluas di beberapa kawasan dan jumlah pengguna mening-

kat daripada 800 kepada ham-pir 1,500 individu.

Tahun lalu, Sze Han berkata kajian semula laluan Bas Smart Selangor dibuat untuk diselaras dalam perancangan Kementerian Pengangkutan bagi meningkatkan mutu perkhidmatan di Lembah Klang.

Penelitian semula itu turut merangkumi penggunaan DRT yang menggantikan Bas Smart Selangor di kawasan berkepadatan tinggi dan laluan sempit pada masa depan.



### Seru rakyat laksana wakaf

## Bantu bangunkan hartanah Islam

Oleh SHEEDA FATHIL

**SHAH ALAM** - Dato' Menteri Besar menyeru umat Islam di negeri ini melaksanakan ibadah wakaf bagi membangunkan institusi hartaanah yang memberi manfaat kepada umat Islam.

Dato' Seri Amirudin Shari berkata Perbadanan Wakaf Selangor (PWS) menguruskan aset termasuk wang yang diwakaf bagi bangunan, institusi

serta aset dan premis seperti masjid dan sekolah.

"Saya menyeru rakyat Selangor, anak syarikat dan pegawai bawah pentadbiran negeri khususnya marilah kita melaksanakan wakaf dengan merujuk kepada PWS," katanya.

Dalam rakaman pada 9 Januari, Pengurus PWS Dato'Ibrahim Md Yusof bersama lima pegawai mengadakan kunjungan hormat ke kediaman rasmi Dato' Menteri Besar di sini.

Kunjungan tersebut bertujuan

berkongsi maklumat berkaitan peranan PWS sebagai institusi wakaf, hala tuju pembangunan hartaanah, ekonomi dan sosial masyarakat melalui konsep itu.

Mereka turut berbincang projek sa-ranan Amirudin melibatkan pembelian asrama pelajar Selangor di Mesir dan galakan kakitangan serta anak syarikat negeri untuk melaksanakan ibadah wakaf.

Sumbangan boleh disalur menerusi laman sesawang [fpw.wakafselangor.gov.my/](http://fpw.wakafselangor.gov.my/)

## Jelajah perpaduan mulai Februari

**SHAH ALAM** - Program Gagasan Rum-pun Selangor yang dijangka berlangsung tiga hari dua malam di setiap lokasi menjelajah ke seluruh negeri mulai Februari, kata EXCO perpaduan.

Datuk Rizam Ismail menjelaskan acara yang dijadual bermula di Hulu Selangor dan berakhir November meliputi sukane-ka rakyat, persembahan kebudayaan dan lawatan ke pusat kraftangan.

"Kita bertuah kerana Dato' Menteri Besar dan Duli Yang Teramat Mulia (DYTM) Raja Muda Selangor turut berkenan ber-rangkat ke setiap program ini," katanya kepada pada 11 Januari.

Pada November tahun lalu, Dato' Seri Amirudin Shari berkata program berkenaan bagi meraih kepelbagaian dan menyemarak semangat perpaduan di-adakan menerusi peruntukan RM4.5 juta.

Selain Rumpun Selangor, Kerajaan Negeri turut memperuntuk RM4 juta bagi menjalankan projek pembangunan desa serta ekonomi kampung tradisi.

Antara program yang bakal dilaksanakan tahun ini adalah Jejak Eko Desa bagi mengenal pasti aktiviti ekonomi berpotensi tinggi untuk mengangkat ekonomi desa.

Sementara itu, Rizam yang juga wakil

rakyat Sungai Air Tawar berazam untuk memperkasa kepimpinan setiap kampung menerusi pelaksanaan sistem penyusunan semula.

Beliau menambah usaha berkenaan bagi menonjolkan kelebihan ekonomi tempatan selain menarik kehadiran pe-lancong sebagai persediaan Tahun Me-lawat Selangor 2025.

"Saya bercadang memperkasa per-anan ketua kampung dan melakukan penyusunan semula pimpinan dalam setiap kampung. Kita juga akan perba-yakkan majlis perpaduan selepas ini," katanya.

Hulu Selangor, Gombak, Petaling, Shah Alam, Hulu Langat dan Sepang

	Imsak	Subuh	Syuru'	Zuhur	Asar	Maghrib	Isyak
18 Khamis	6:04	6:14	7:23	1:26	4:48	7:24	8:37
19 Jumaat	6:04	6:14	7:23	1:26	4:49	7:24	8:37
20 Sabtu	6:04	6:14	7:23	1:27	4:49	7:24	8:38
21 Ahad	6:05	6:15	7:24	1:27	4:49	7:25	8:38
22 Isnin	6:05	6:15	7:24	1:27	4:49	7:25	8:38
23 Selasa	6:05	6:15	7:24	1:28	4:50	7:25	8:38
24 Rabu	6:06	6:16	7:24	1:28	4:50	7:26	8:39

Klang dan Kuala Langat

Imsak	Subuh	Syuru'	Zuhur	Asar	Maghrib	Isyak
6:04	6:14	7:24	1:27	4:49	7:25	8:38
6:04	6:14	7:24	1:27	4:49	7:25	8:38
6:04	6:14	7:24	1:27	4:50	7:25	8:39
6:05	6:15	7:25	1:28	4:50	7:26	8:39
6:05	6:15	7:25	1:28	4:50	7:26	8:39
6:05	6:15	7:25	1:28	4:50	7:26	8:39
6:06	6:16	7:25	1:28	4:51	7:27	8:39

Sabak Bernam dan Kuala Selangor

Imsak	Subuh	Syuru'	Zuhur	Asar	Maghrib	Isyak
6:06	6:16	7:25	1:29	4:51	7:25	8:39
6:07	6:17	7:25	1:29	4:51	7:26	8:39
6:07	6:17	7:26	1:29	4:51	7:26	8:39
6:07	6:17	7:26	1:29	4:52	7:26	8:39
6:08	6:18	7:26	1:30	4:52	7:27	8:40
6:08	6:18	7:26	1:30	4:52	7:27	8:40
6:08	6:18	7:26	1:30	4:52	7:27	8:40



**CERIA...** EXCO Kebajikan Masyarakat Anfaal Saari (tiga, kiri) menerima kunjungan Pesuruhjaya Tinggi Bangsa-Bangsa Bersatu untuk Pelarian (UNHCR) yang diketuai Pegawai Perlindungan Kanan Keane Shum (tiga, kanan) dan Ketua Perlindungan Komuniti Dr Susheela Balasundram di bangunan pentadbiran negeri pada 15 Januari. Antara dibincangkan potensi kerjasama bagi menangani isu pelarian di Selangor. Foto Facebook Anfaal Saari

**RM275,000 bantu nelayan lima daerah**

## Agih peralatan, bakul makanan

Oleh **SITI ROHAIZAH ZAINAL**

**KLANG** - Kerajaan Negeri menyalur bantuan alat menangkap ikan dan bakul makanan bernilai RM275,000 kepada nelayan meliputi lima daerah menerusi Program Pembangunan Agroprenuer.

EXCO Pertanian Ir Izham Hashim menjelaskan bantuan menerusi peruntukan pada tahun lepas itu tidak dapat diserah sebelum ini berikutan beberapa faktor termasuk pilihan raya negeri.

"Kita serah bantuan kepada nelayan iaitu enam sampan, lima enjin dan 40 bakul makanan. Kita akan agihkan lagi

bantuan pukat dan tong minyak kepada 200 penerima dalam masa terdekat.

"Secara keseluruhan, peruntukan RM400,000 disediakan pada 2023 dan tahun ini bantuan sama akan diteruskan dalam membantu nelayan."

"Diharap dengan bantuan ini nelayan dapat memanfaatkannya untuk meningkatkan hasil pendapatan dan membantu keluarga serta persatuan," katanya pada 9 Januari.

Sumbangan tersebut diserah kepada persatuan nelayan Sepang, Kuala Selangor, Kuala Langat, Klang dan Sungai Besar di Jeti Nelayan Sungai Sireh di sini.

Nelayan Mohd Fauzi Shahar, 37, mengakui terharu menerima bantuan

sampan walaupun beliau menyimpan hasrat membelyinya untuk menambah pendapatan tetapi berdepan masalah kewangan.

"Kini dengan bantuan sampan berseiz 27 kaki, saya dapat pergi lebih jauh sedikit (ke laut) dan tambah pendapatan," katanya.

Pertama kali menerima bantuan, Abdul Malik Mansor, 45, yang menerima enjin bot pula berterima kasih atas keprihatinan pentadbiran negeri.

"Gembira kerana enjin sedia sudah berusia 10 tahun, kerap rosak, setiap kali dibaiki, kos mencecah hampir RM600. Bantuan ini memudahkan saya untuk turun ke laut," kata nelayan itu.

## Teruskan turap jalan, lampu LED

**KLANG** - Projek turapan jalan besar-besaran meliputi sembilan daerah di Selangor sepanjang tahun lalu akan diteruskan, kata EXCO Infrastruktur Ir Izham Hashim.

Beliau menambah projek pemasangan lampu diod pemancar cahaya (LED) menerusi program Selangor Bercahaya turut diteruskan demi manfaat segenap lapisan rakyat.

"Cuma jumlah peruntukan berbeza. Contohnya turapan sebelum ini menelan kos RM50 juta, (kali ini) mungkin RM20 juta. Saya akan maklumkan

peruntukan kedua-dua projek dalam masa terdekat.

"Usaha ini perlu berterusan supaya semua rakyat dapat manfaat," katanya pada 9 Januari.

Ir Izham menjelaskan kedua-dua projek tersebut melibatkan kerjasama wakil rakyat dan ahli majlis kawasan masing-masing berbanding pihak berkuasa tempatan sahaja sebelum ini.

"Ini bagi mengelakkan terlepas pandang atau buat (kerja) di tempat sama, ini kita tidak mahu, sebab itu projek diteruskan dengan penglibatan wakil

rakyat dan ahli majlis," katanya.

Projek Turapan Mega selenggaraan Infrasel Sdn Bhd (Infrasel) melibatkan 66 jalan di Petaling diikuti Klang (39), Gombak (29), Hulu Langat (27), Sepang (19), Sabak Bernam (17), Kuala Langat (16), Kuala Selangor (11) dan Hulu Selangor (lapan).

Sebelum ini, Dato' Menteri Besar Dato' Seri Amirudin Shari berkata projek berskala besar dijalankan menerusi dana RM50 juta demi memastikan jaringan jalan raya negeri selamat dan selesa kepada pengguna.

## Anjur jualan murah dalam talian

**KLANG** - Perbadanan Kemajuan Pertanian Selangor (PKPS) membuka permohonan penganjuran Jualan Ehsan Rahmah (JER) dalam talian.

Pengurus Besar Sektor Perniagaan dan Pemasarannya Rosnani Abd Malik berkata permohonan itu bagi penganjuran dalam tempoh tiga bulan sehingga Mac.

"Kita buka permohonan ini kepada semua pihak seperti wakil rakyat, ketua kampung, pihak berkuasa tempatan, ahli majlis atau jabatan kerajaan.

"Mereka boleh memohon bergantung kepada kemampuan mengendalikan jualan dan tempoh kelulusan dua minggu," katanya pada 15 Januari.

Permohonan menerusi pautan [docs.google.com/forms/d/e/1FAIpQLSdPswfwt5yMI6KAkSyU4HgwYR3Xnzz7GgHqAQtrpyaQ9Jytjg/viewform](https://docs.google.com/forms/d/e/1FAIpQLSdPswfwt5yMI6KAkSyU4HgwYR3Xnzz7GgHqAQtrpyaQ9Jytjg/viewform)

## Jimat kos senggara RM7.3 juta

**SHAH ALAM** - Kerja pemasangan lampu jalan diod pemancar cahaya (LED) di seluruh kawasan Majlis Bandaraya Shah Alam (MBSA) siap 98 peratus setakat ini sejak projek itu dijalankan pada 2018.

Pemangku Datuk Bandar Ir Cheremi Tarmam menjelaskan kerja penggantian 46,000 lampu jalan sedia ada kepada LED dijangka siap sepenuhnya pada tahun ini.

"Hampir 98 peratus ditukar kepada LED bawah program penukaran lampu jalan. Hasil penukaran ini, bil lampu jalan mencatat penurunan daripada RM13 juta pada 2018 kepada RM5.7 juta pada 2022.

"Pengurangan bil ini bukan sahaja menjimatkan tetapi mengurangkan pelepasan karbon selaras Rancangan Selangor Pertama (RS-1) ke arah memacu kelestarian," katanya pada 15 Januari.

## Kaunter bergerak daftar Padu

**SHAH ALAM** - Jabatan Perangkaan Malaysia (DOSM) Selangor membuka kaunter bergerak di Klang dan Kuala Selangor bagi memudahkan orang ramai mendaftar Sistem Pangkalan Data Utama (Padu).

Orang ramai hanya perlu membawa telefon bimbit, kad pengenalan, salinan kad pengenalan ahli isi rumah dan maklumat akaun bank bagi individu berumur 18 tahun ke atas dalam isi rumah.

"Kedatangan semua penduduk, khususnya warga Klang dan Kuala Selangor yang berada berdekatan adalah dilu-lukan.

"Anda juga boleh mendaftar terus secara atas talian di laman sesawang rasmi [www.padu.gov.my](http://www.padu.gov.my)," kata kenyataan DOSM Selangor di Facebook pada 12 Januari.

## Perluas khidmat bas dua tingkat

**SEPANG** - Perkhidmatan bas pelancongan dua tingkat Hop-On Hop-Off (HOHO) yang diperkenal Tourism Selangor menarik kira-kira 1,500 pelancong sejak dilancarkan Jun tahun lalu.

Pengurus pembangunan perniagaan dan pemasaran Tourism Selangor Promosi Sdn Bhd berkata setakat ini perkhidmatan berkenaan beroperasi setiap Sabtu dan Ahad di 10 destinasi sekitar Sepang.

Cheong Ei Leen berkata pihaknya merancang untuk menambah bas bergantung kepada pelabur dan seterusnya mengembangkan perkhidmatan itu ke daerah lain.

"Sasaran pasaran kita antaranya adalah pelancong luar negara yang transit di negara ini dan mahu mengisi masa menunggu mereka dengan aktiviti lawatan jangka masa pendek.

"Pelbagai usaha dilakukan untuk terus mempromosi dan memperkenalkan HOHO termasuk menerusi hebatan media sosial, kerjasama pempengaruh, media dan rakan kerjasama lain," katanya pada 16 Januari.

## Baik pulih jalan di Pelabuhan Klang

**SHAH ALAM** - Infrasel Sdn Bhd (Infrasel) menjalankan kerja membaiki permukaan jalan di sebahagian laluan di Jalan Telok Gong, Pelabuhan Klang.

Menurut Kumpulan Semesta Sdn Bhd, kerja baik pulih yang dilaksanakan unit perniagaan strategiknya mencapai 17 peratus sejak 15 Januari.

"Infrasel sedang laksanakan kerja memperbaiki permukaan jalan di sebahagian laluan Jalan Telok Gong, Pelabuhan Klang. Peratusan kerja cecah 17 peratus," katanya di Facebook pada 17 Januari.

Pada 9 dan 11 Januari, Infrasel giat melaksanakan kerja memperbaiki permukaan jalan di Kuala Selangor.

## 100 menang cabutan bertuah

**SHAH ALAM** - Seramai 100 usahawan menangi cabutan bertuah Kempen Bayar Balik dan Menang 2023 anjuran Yayasan Hijrah Selangor (Hijrah).

Ketua Pegawai Eksekutifnya Dato' Mearia Hamzah berkata pemenang antara 703 usahawan terpilih yang menyertai program julung kali dianjurkan sejak 1 Januari hingga 18 Disember tahun lalu.

"Kempen ini bertujuan menghargai usahawan atas kesungguhan dan disiplin yang ditunjukkan dalam membuat bayaran balik pembiayaan."

"Mereka yang terpilih untuk serta program ini adalah mereka yang membayar pinjaman setiap minggu tanpa sebarang tunggakan," katanya pada 10 Januari.

Cabutan dijalankan mengikut dua kategori iaitu bagi pembiayaan RM30,000 ke bawah dan RM31,000 hingga RM100,000.

## Mudahkan urus niaga pelancong

**SABAK BERNAM** - Kaedah transaksi tanpa tunai yang digunakan peniaga sekitar Sekinchan sejak tahun lalu menggamit kehadiran lebih ramai pelancong ke Dewan Undangan Negeri (DUN) tersebut.

EXCO Pelancongan Dato' Ng Suee Lim, yang juga wakil rakyat kawasan berkenaan, berkata kaedah itu memudahkan urusan jual beli pelancong selain menjamin keselamatan mereka.



"Langkah ini memberi manfaat kepada penduduk. Pelancong suka kaedah ini kerana tidak lagi perlu bawa wang yang banyak. Hanya perlukan kad bank atau telefon bimbit, pembayaran selesai."

"Kaedah ini bukan hanya dikhaskan untuk pelancong sahaja tetapi turut dimanfaatkan pelajar. Mereka diberi kad yang mempunyai nilai dan boleh digunakan di se-

olah," katanya.

Beliau merai kumpulan ejen pelancongan dari Thailand yang mengadakan lawatan ke Anjung Utara bagi meninjau lokasi menarik sekitar Kuala Selangor hingga Sabak Bernam pada 9 Januari.

Tahun lalu, Hong Leong Bank Bhd dengan kerjasama Payments Network Malaysia Sdn Bhd memilih Sekinchan sebagai kampung tanpa tunai pertama di Malaysia dalam program Visit Sekinchan 2023.

### Manfaat pemegang polisi Iltizam Selangor Sihat

## Tanggung rawatan RM10,000 setahun

Oleh **FITRI HAZIM HAZAM**

**SHAH ALAM** - Pemegang polisi Iltizam Selangor Sihat (ISS) bakal menerima manfaat sehingga RM10,000 setahun untuk menerima rawatan di hospital terpilih, kata EXCO kesihatan awam.

Jamaliah Jamaluddin berkata mereka yang berusia 80 tahun ke bawah boleh menggunakan dalam kes kecemasan di hospital kerajaan atau rujukan doktor dari klinik Selcare jika kes biasa.

"Pendaftaran dibuat di Klinik Tele-

medicine SelCare melalui aplikasi Langkah Masuk Dengan SeIamat (SELangkah) dan rujukan doktor klinik kerajaan serta swasta," katanya pada 11 Januari

Beliau menjelaskan pembaruan berkenaan antara usaha bagi menambah baik program perlindungan kesihatan rakyat pada tahun ini.

Jamaliah juga menambah Selangor Saring, sebuah program saringan kesihatan percuma anjuran pentadbiran negeri sebelum ini juga akan ditam-



bah baik untuk kepentingan rakyat.

Belanjawan Selangor 2024 memperuntuk RM35 juta bagi kesinambungan program ISS yang membantu pemegang polisi mendapat rawatan segera di klinik swasta.

Setiap pemegang polisi layak mendapat rawatan asas dan suntikan RM500 setahun bagi kategori keluarga, manakala individu RM250 setahun di mana-mana klinik panel seluruh negeri.

## Pacu usaha lestari alam sekitar

**SUBANG JAYA** - Program penanaman pokok anjuran pelbagai pihak menggalakkan kehijauan persekitaran terutama persekitaran bandar sekali gus mengurangkan pelepasan karbon.

Menjelaskan kegiatan tersebut selaras hasrat Rancangan Selangor Pertama (RS-1), EXCO Pelaburan Ng Sze Han berkata pentadbiran negeri sentiasa memacu usaha melestari alam sekitar.

Justeru, beliau memuji program anjuran Majlis Bandaraya Subang Jaya (MBSJ) dengan kerjasama Malaysian

Institute of Planners (MIP) yang disertai tujuh pemaju perumahan.

"Program seperti ini harus diteruskan di kawasan lain dan tidak terhad di Kinrara sahaja," katanya yang juga wakil rakyat Kinrara dalam program Pledge and Plant A Tree pada 13 Januari.

Sebanyak 35 pokok pelbagai spesies ditanam di kawasan sekitar termasuk Rantai Emas, Kiara Payung, Cempaka Putih, Bungor dan Black Rosewood.

Timbalan Pengarah Perancang Bandar MBSJ Hazman Mohd Mahayu-

## Hijrah sasar RM60 juta biaya peniaga

**SHAH ALAM** - Yayasan Hijrah Selangor (Hijrah) menasarkan pembiayaan RM60 juta sepanjang tahun ini bagi melaksanakan semua skim kendalian agensi itu.

Ketua Pegawai Eksekutifnya Dato' Mearia Hamzah berkata Hijrah akan neruskan skim sedia ada bagi membantu lebih ramai usahawan yang memerlukan pinjaman perniagaan.

"Kami sentiasa berusaha untuk membantu usahawan tempatan. Setakat ini,

tiada skim baharu yang akan diperkenal tetapi kita akan teruskan dengan apa yang ada," katanya.

Beliau menghadiri cabutan bertuah Kempen Bayar Balik dan Menang 2023 di pejabat Perbadanan Teknologi Maklumat dan Ekonomi Digital Selangor (Sidec) di sini pada 10 Januari.

Mearia menambah Hijrah menumpukan usaha membantu usahawan mengembangkan lagi perniagaan khu-

din pula berkata pihaknya menasarkan penanaman 350,000 pokok tahun ini dengan tumpuan spesies penyerahan tinggi dan bertahan lama.

"Pada 2022, kita tanam 227,863 pokok dan terus meningkat tahun lalu sebanyak 320,000. Justeru tahun ini, kita sasar lebih banyak lagi pokok ditanam, sebanyak 350,000."

"Kita tumpu kawasan yang kurang pokok. Selepas ini, ia akan diteruskan di Puchong Jaya, Seri Kembangan dan Putra Permai," kata beliau.

susnya menerusi platform e-dagang Shopee.

Jelasnya, agensi berkenaan memulakan Hijrah Official Store di Shopee mulai September tahun lalu dan mendapat sambutan menggalakkan daripada peniaga juga pembeli.

Dapatkan produk usahawan Hijrah menerusi pautan shopee.com.my/yhsjana dengan pembelian RM50 ke atas dikecualikan caj penghantaran.



**MURAH...** Pengunjung tidak melepaskan peluang berbelanja di Jualan Ehsan Rahmah peringkat Dewan Undangan Negeri Meru selepas program berkenaan bermula selama dua minggu di Masjid al-Falah, Klang pada 15 Januari. Foto NUR ADIBAH AHMAD IZAM ► BERITA MUKA 8

Anjur sidang bulan hadapan

# Susun semula 2,010 koperasi berdaftar

Oleh SOFIA NASIR

**SHAH ALAM** - Peranan semua 2,010 koperasi berdaftar di Selangor akan disemak semula bagi membantu lancaran operasi mereka, kata EXCO Pengguna Datuk Rizam Ismail.

Menjelaskan bilangan itu tertinggi di negara ini, beliau berkata satu persidangan diadakan pada Februari yang turut dihadiri Dato' Menteri Besar Dato' Seri Amirudin Shari.

"Ini pertama kali ada portfolio ko-

perasi. Jadi, kita akan adakan persidangan dan mengumpul semua koperasi untuk kita lihat bagaimana kita boleh bantu," katanya pada pada 11 Januari.

Sebelum ini, Menteri Pembangunan Usahawan dan Koperasi Datuk Ewon Benedick berkata koperasi berperanan dalam membasmi kemiskinan dengan menawarkan harga barang lebih rendah manakala ahlinya menikmati dividen.

Dalam isu lain, Rizam menambah



pihaknya sentiasa memantau harga barang asas di negeri ini bagi memastikan tiada peningkatan harga mendadak atau kekurangan bekalan.

"Kita terus bekerjasama dengan Kementerian Perdagangan Dalam Negeri dan Kos Sara Hidup untuk memantau harga barang semasa.

"Kita tidak mahu harga melonjak atau kita hadapi kekurangan bekalan khususnya ketika musim perayaan," katanya.

## Segera daftar inisiatif air percuma

**SHAH ALAM** - Warganegara yang pendapatan isi rumahnya bawah RM5,000 dan menetap atau menyewa di Selangor dipelawa memohon skim air percuma 20 meter padu sebulan.

Menurut kenyataan Pengurusan Air Selangor Sdn Bhd (Air Selangor) di laman X pada 12 Januari, permohonan Skim Air Darul Ehsan (SADE) dibuka sehingga 31 Disember tahun ini.

Syarat permohonan lain ialah kedia-

man pemohon mesti jenis meter individu dan layak memohon untuk satu akaun sahaja.

Orang ramai disaran melayari pautan [www.airselangor.com/residential/skim-air-darul-ehsan/](http://www.airselangor.com/residential/skim-air-darul-ehsan/) untuk maklumat lanjut.

Pada Julai tahun lalu, Dato' Menteri Besar Dato' Seri Amirudin Shari memaklumkan pemberian air percuma masih dijalankan dan manfaat tersebut dinikmati hampir empat juta pengguna.

Program bertujuan meringankan beban rakyat yang diperkenal hampir 10 tahun turut ditambah baik tetapi hanya diberi kepada isi rumah yang benar-benar layak.

Mulai 1 Oktober 2022, syarat kelayakan air percuma 20 meter padu setiap bulan juga diubah dengan menaikkan had maksimum pendapatan isi rumah daripada RM4,000 kepada RM5,000 ke bawah.

## Kongsi ilmu tanaman, urut

**SHAH ALAM** - Program Imaarah Wanita dan Keluarga Madani yang julung kali diadakan menjadi medan untuk kaum Hawa meneroka pelbagai kegiatan bermanfaat.

EXCO pembangunan wanita dan keluarga berkata pelbagai pengisian menarik disediakan antaranya program kerohanian, forum kekeluargaan, perkongsian ilmu tanaman dan kelas mengurut.

"Kita berhasrat untuk perluaskan program ini dan anjurkan secara bulanan memandangkan manfaatnya yang besar. Penganjuran ini sebagai inisiatif untuk kita terus memperdaya golongan wanita."

"Dalam masa sama, program ini menguar-uarkan khidmat Wanita Berdaya Selangor dalam membantu wanita terutama menerusi program-programnya," kata Anfaal Saari pada 14 Januari.

## Akademi lahirkan 280 graduan

**SHAH ALAM** - Akademi Kepimpinan Wanita (AKW) melahirkan 280 graduan sejak diperkenal pada 2020, kata EXCO Pembangunan Wanita dan Keluarga Anfaal Saari.

Beliau menjelaskan graduan menjalani kursus lapangan politik dan kerja sosial selama 15 bulan bagi memantapkan potensi kepimpinan.

"Mereka pelajar dari kohot pertama hingga ketiga. Sesi kohot keempat sedang dibuka. Peserta dapat menimba ilmu dan kemahiran menerusi biasiswa Kerajaan Negeri," katanya pada 14 Januari.

Program tajaan Kerajaan Selangor itu menawarkan empat modul utama iaitu kemahiran insaniah dan organisasi, kefahaman gender, kepimpinan politik dan ekonomi serta kemahiran komunikasi.

Kelas diadakan setiap Rabu bermula 6 petang hingga 9 malam di Perbadanan Perpustakaan Awam Selangor (PPAS).

## Tanam pokok ceriakan universiti

**SHAH ALAM** - Sebanyak 300 pokok ditanam sekitar Amphitheater Universiti Teknologi Mara (UiTM) Shah Alam di sini dalam Festival Rhythmba yang julung kali diadakan pada 12 Januari.

Festival Alam dan Muzik anjuran Agenси Prologue, terdiri pelajar Perhubungan Awam, Fakulti Komunikasi dan Pengajian Media UiTM serta Gadang Holdings Berhad sebagai tanggungjawab sosial korporat kepada masyarakat.

Program dirasmikan EXCO Alam Sekitar Jamaliah Jamaluddin bagi memberi kesedaran mengenai kepentingan penanaman pokok selaras matlamat pembangunan mampan dan impak terhadap alam sekitar.

"Ia juga bertujuan menaik taraf infrastruktur Amphitheater yang ditinggalkan selama beberapa tahun menjadi 'Taman Mesra Alam' pertama sekali gus tarikan utama UiTM Shah Alam," katanya.

## Tawar dua produk makanan baharu

**SUBANG JAYA** - Perbadanan Kemajuan Pertanian Selangor (PKPS) mengekal harga semua barang yang ditawarkan dalam program Jualan Ehsan Rahmah (JER) pada tahun ini.

Menegaskan tiada kenaikan harga barang, Penyelarasnya Muhammad Syahmi Asyamawi Solahudin berkata selain tiada kenaikan harga, pihaknya turut menawarkan serbuk minuman koko dan biskut mentega jenama Ehsan di setiap lokasi jualan.

"Kita ada serbuk minuman koko yang dijual pada harga hanya RM14 untuk satu kilogram dan biskut mentega dengan harga RM8 sekotak. Kedua-dua ini adalah produk baharu PKPS yang mula dijual hari ini."

"Kita juga masih membawa barang lain pada kuantiti yang sama iaitu 500 ekor ayam, daging dan ikan 200 pek, 300 papan telur dan pek beras," katanya pada 15 Januari.

## Sasar jualan murah dua bulan sekali

**SUBANG JAYA** - Pusat Khidmat Dewan Undangan Negeri (DUN) Kinrara berhasrat menganjurkan Jualan Ehsan Rahmah (JER) sekurang-kurangnya dua kali sebulan bagi memenuhi permintaan penduduk.

Penyelia pusat khidmat itu Rachel Lee berkata pihaknya berazam membantu lebih ramai penduduk mendapatkan barang keperluan asas pada harga murah khususnya golongan berpendapatan rendah.

"Sepanjang tahun lalu, kita adakan lebih 50 kali JER di DUN Kinrara. Untuk tahun ini, kita mahu pertingkatkan lagi. Malah, jika ada slot kosong kita juga tidak teragak-agak untuk terima."

"Ini semua kita lakukan untuk membantu penduduk terutama mereka yang miskin dan tidak mampu membeli barang dapur di pasar raya," katanya pada 15 Januari.

## Bantu peniaga bayar pinjaman

**SHAH ALAM** - Yayasan Hijrah Selangor (Hijrah) menawarkan pelan pemulihan pembiayaan kepada peminjam yang berdepan masalah kewangan termasuk kesukaran membayar tuggakan pinjaman.

Justeru, semua usahawan terlibat disarankan supaya membuat permohonan bagi menyusun semula ansuran bulanan di mana-mana cawangan pejabat Hijrah berhampiran.

"Kami bersedia membantu anda dengan tawaran pelan pemulihan pembiayaan bagi menyusun semula jadual pembayaran balik anda," kata kenyataan di Facebook pada 13 Januari.

Usahawan diminta menghubungi pegawai kutipan 18 Cawangan Hijrah Selangor untuk maklumat lanjut. Semakan baki pembiayaan boleh dibuat dalam talian menerusi mikrokredit.selangor.gov.my/

## PKPS tambah kuantiti bekalan ayam

**KLANG** - Sebanyak 1,500 ekor ayam disejakan di tiga lokasi Jualan Ehsan Rahmah (JER) yang kembali menemui orang ramai pada 15 Januari selepas berehat dua minggu.

Pengurus besar Sektor Perniagaan dan Pemasaran Perbadanan Kemajuan Pertanian Selangor (PKPS) berkata jumlah itu lebih banyak berbanding 300 ekor setiap lokasi sebelum ini.

"Kita bercuti untuk penyelenggaraan bagi memastikan bekalan dan logistik lebih tersusun. Kembali menemui orang

ramai, kita bawa 1,500 ekor ayam di tiga lokasi jualan murah.

"Bagi lima produk lain pula seperti biasa 300 telur, ikan, beras, daging manakala minyak masak 100 botol," kata Rosnani Abd Malik di Masjid al-Falah, Meru di sini.

Tambah beliau, PKPS giat mempromosi JER menerusi wakil rakyat selain hebat media sosial.

PKPS juga mewajibkan semua produk jenama Ehsan dibawa ke setiap lokasi jualan murah.

"Contohnya lebih 20 unit simpanan

barang seperti sardin, sos, bihun, biskut dan kordial dibawa ke lokasi. Biarpun tiada subsidi, harganya lebih murah berbanding pasaran," katanya.

JER menawarkan ayam RM10 seekor, daging pejal segar (RM10 per pek) dan telur gred B (RM10 seapan), ikan kembung (RM6 setiap pek), minyak masak lima kilogram (RM25) dan beras lima kilogram (RM13).

Semak lokasi terkini jualan murah di Facebook PKPS, imbas kod QR di poster jualan atau pautan linktr.ee/myPKPS

## Berjaya tubuh 1,152 syarikat

# Usahawan muda raih RM2.48 juta

Oleh **NAS NORZIELA NASBAH**

**SHAH ALAM** - Usahawan muda Program Tunas Niaga (PROTUNE) seliaan Perbadanan Kemajuan Negeri Selangor (PKNS) merekod pendapatan keseluruhan RM2.48 juta tahun lalu.

Timbalan ketua pegawai eksekutif (Pengurusan dan Keusahawanan) juga berkata 1,152 syarikat berjaya ditubuh dengan jualan bernilai RM28.89 juta sejak 2009 sehingga tahun lalu.

"Ini satu pencapaian yang membanggakan dalam usaha Bahagian Pembangunan Usahawan PKNS mencungkil bakat-bakat muda di peringkat pelajar sekolah menengah bagi melahirkan usahawan cilik berdaya maju, berdaya saing dan berdaya tahan."

"PKNS percaya budaya keusahawanan ini merangkumi nilai dan aspek yang dapat membentuk keperibadian positif seterusnya tidak gentar berdepan dengan cabaran pada masa hadapan," kata Suhaimi Kasdon.

Beliau menghadiri majlis konvolesyen PROTUNE di sini pada 10 Januari. Hadir sama Timbalan Pengarah Sektor Pembangunan Murid Jabatan Pendidikan Negeri Selangor Yasmin Kamarudin dan Duta Keusahawanan PKNS Datuk Rosyam Nor.

Sebanyak 10 kategori dipertanding iaitu anugerah harapan, perkhidmatan terbaik, produk kreatif terbaik, produk inovasi terbaik, laporan kewangan terbaik, ketua pegawai eksekutif terbaik, guru pembimbing terbaik, persebahan terbaik sekolah terbaik dan syarikat terbaik.

Sekolah Menengah Kebangsaan Bukit Gading, Sungai Buloh mengekal kejuaraan syarikat terbaik dua tahun berturut-turut menerusi syarikat Tuah Gading Sdn Bhd selain memenangi Laporan Kewangan Terbaik (johan), Persembahan Terbaik (johan), Perkhidmatan Terbaik (kedua), Sekolah Terbaik (kedua) dan Ketua Pegawai Eksekutif (ketiga).

PROTUNE menyediakan platform untuk mengikuti bengkel dan seminar bimbingan berkaitan perjalanan syarikat, latihan keusahawanan serta perniagaan secara praktikal.

Antara latihan disediakan termasuk penjualan produk makanan dan minuman, seni kraftangan, pakaian serta perkhidmatan seperti fotografi, dobi dan katering.

## Bukit Gading kekal syarikat terbaik

**SHAH ALAM** - Sekolah Menengah Kebangsaan (SMK) Bukit Gading, Sungai Buloh mengekal kejuaraan syarikat terbaik program usahawan muda Perbadanan Kemajuan Negeri Selangor (PKNS).

Kejayaan dua tahun berturut-turut itu menobatkan syarikat Tuah Gading Sdn Bhd pemenang Piala Pusingan Ketua Pegawai Eksekutif Program Tunas Niaga (PROTUNE) Selangor 2023.

Menurut guru bimbingan Nor Azliani Razali, komitmen 100 peratus diberi ahli syarikat, guru serta pentadbir membawa kepada kejayaan besar sekolah mereka.

"Sejak 2017, kami memenangi anugerah persembahan terbaik dan memangkin semangat untuk terus

meningkatkan usaha sehingga memenangi beberapa anugerah serta syarikat terbaik."

"Tiada istilah putus asa untuk kami tingkatkan jualan setiap tahun. Bimbingan PROTUNE, PKNS memberi tunjuk ajar bagi memperbaiki pendapatan untuk sekolah," katanya pada 10 Januari.

Mencatat jualan RM150,000 tahun lalu, anugerah lain yang dimenangi ialah Persembahan Terbaik (johan), Laporan Kewangan Terbaik (johan), Perkhidmatan Terbaik (kedua), Sekolah Terbaik (kedua) dan Ketua Pegawai Eksekutif Terbaik (ketiga).

Pemenang utama Anugerah Ketua Pegawai Eksekutif Terbaik, Muhammad



Haikal Hazim Nor Mohd Sofian berkata kemenangan itu menaikkan semangatnya untuk berkecimpung dalam keusahawanan.

"Saya bersyukur terbabit dengan PROTUNE kerana banyak perkara baru dipelajari, yang penting bukan mudah untuk menggalas tanggungjawab sebagai ketua pegawai eksekutif."

"Melalui bimbingan, saya berjaya mengharunginya," katanya dari Sekolah Menengah Agama Persekutuan Kajang yang mengemudi syarikat Irsul Najmi.

Pemenang Anugerah Guru Bimbingan Terbaik, Zulhakim Munjari pula menganggap kemenangan syarikat Suajaya Madani menjulang imej SMK Ungku Aziz ke peringkat lebih tinggi.





al-Ghazali  
sangsi ahli  
falsafah

14



Antara  
realisme  
dan fantasi  
16

# Cekap tambah maju



Dr Mohd Afzanizam

**D**ibentang 11 November tahun lepas, Belanjawan Selangor 2024 menggerak ekonomi negeri dicelah ketidakstabilan geopolitik global dan kelembapan ekonomi dunia.

Bertema Selangor Mandiri: Memacu Kemajuan, Memicu Perpaduan, rang undang-undang perbekalan berkenaan yang dibaca Dato' Menteri Besar Dato' Seri Amirudin Shari menggariskan empat teras utama.

Menyasar pelaburan berkualiti untuk pembangunan berterusan, memperkasa pendidikan selain menjaga alam sekitar dengan teknologi baharu, kebajikan rakyat terbanyak kekal keutamaan belanjawan negeri.

Tidak ketinggalan, usaha memartabat umat Islam terus diberi tumpuan.

**Belanjawan kali ini defisit RM330 juta dan defisit ini sudah enam tahun berturut-turut. Boleh ulas mengenainya?**

Ini sebenarnya situasi yang bagus, cuma bila sebut perkataan defisit, konotasinya dibayangi negatif. Sebenarnya defisit belanjawan terjadi bila kerajaan berbelanja lebih daripada hasil.

Defisit fiskal bererti pihak kerajaan berbelanja melebihi apa yang mereka dapat melalui kutipan-kutipan hasil cukai dan bukan cukai.

Sebagai contoh, Belanjawan 2024 dijangka melibatkan kutipan hasil berjumlah RM2.2 bilion, manakala perbelanjaan pula RM2.53 bilion.

Perbezaan dua angka ini akan memberi angka negatif iaitu RM330 juta, defisit fiskal yang bakal dicatatkan pada tahun ini. Namun,

kita perlu memahami konteks defisit fiskal dan bagaimana ia mampu untuk menjana pertumbuhan ekonomi negeri Selangor.

Jika kita lihat pecahan perbelanjaan Kerajaan Negeri, ia terbahagi kepada dua iaitu perbelanjaan mengurus (RM1.33 bilion) dan perbelanjaan pembangunan (RM1.2 bilion).

Perbelanjaan mengurus melibatkan gaji kakitangan awam, perkhidmatan dan bekalan serta pelbagai lagi cabang yang akan melancarkan jentera Kerajaan Negeri.

Perbelanjaan pembangunan melibatkan perbelanjaan dalam sektor sosial, infrastruktur serta pembangunan ekonomi yang akan memberi kesan langsung kepada Keluaran Dalam Negara Kasar (KDNK) Selangor. Malah perbelanjaan lebih kepada rakyat terus beri limpahan ekonomi. Yang mana,

Wartawan NADIAH ZAMLUS merakam pandangan Ketua Ekonomi Bank Muamalat Malaysia Berhad (BMMB) Dr Mohd Afzanizam Abdul Rashid mengenai Belanjawan Selangor 2024 dalam temu bual pada 10 Januari.

Pernah berkhidmat di Kumpulan Wang Simpanan Pekerja (KWSP), Bank Islam Malaysia Berhad dan Kumpulan Wang Persaraan Diperbadankan (KWAP), Afzanizam ada 20 tahun pengalaman penyelidikan pelaburan khususnya ekonomi dan pasaran modal.

Lulusan doktor falsafah (ekonomi) Universiti Kebangsaan Malaysia itu kini penyelidik ekonomi dan industri kepada pengurusan BMMB untuk strategi, perniagaan serta pengurusan risiko.

situasi ini memenangkan rakyat.

**Apa pandangan apabila Selangor menyatakan azam melunaskan hutang Kerajaan Persekutuan sepenuhnya tahun ini?**

Hutang sudah selesai bayar maksudnya kerajaan itu sangat bertanggungjawab. Bagi saya usaha ini ada makna.

Pertamanya, Kerajaan Selangor sentiasa berhemah dalam mengatur kewangannya sehingga ia mampu untuk melunaskan hutangnya.

Kalau dari sudut pandang pasaran kewangan, Selangor mempunyai risiko mungkir atau default risk rendah. Sekiranya Kerajaan Negeri mendapatkan penarafan kredit daripada agensi penarafan kredit, berkemungkinan ia berlegar sekitar AAA dan AA.

Mereka ada ruang dasar fiskal,

boleh guna bila keperluan mendesak. Bila berlaku tekanan ekonomi atau kemelesetan, maka kerajaan boleh guna ruang dasar fiskal sekiranya amat diperlukan... jika berlaku kelembapan ekonomi meruncing. Kalau boleh memang kita tidak mahulah.

Terbaru, Bank Dunia buat unjuran pertumbuhan ekonomi global 2.4 peratus berbanding 2.6 peratus sebelumnya.

Tinjauan ekonomi sekarang juga tidak stabil dengan situasi ekonomi global, faedah tinggi, situasi geopolitik China-Amerika Syarikat, juga Timur Tengah, semua beri kesan kepada ekonomi Malaysia.

Jika permintaan luar terjejas, maka ekonomi kita juga boleh terjejas. Jika dasar fiskal luas, maka Selangor ada peluang lebih bagus.

Bersambung ►

Ini bermakna Kerajaan Negeri boleh sahaja meminjam dengan Kerajaan Persekutuan dengan mudah disebabkan rekod baik.

Justeru, Kerajaan Negeri ada fleksibiliti kewangan baik yang seharusnya akan diterjemahkan melalui keyakinan pelabur dan peniaga.

Kalau hutang berterusan banyak, setiap kali belanjawan mesti fokus mahu bayar hutang sahaja. Cerita mudah, jika hutang habis, maka belanja untuk rakyat lebih banyak.

**Pentadbiran Lembah Klang Raya Selangor** bakal wujud meliputi empat bandar raya menerusi penggubalan Enakmen Lembah Klang Raya. Apa kesan terhadap ekonomi Selangor dan Lembah Klang khususnya?

Gabungan ini babitkan Petaling Jaya, Subang Jaya, Shah Alam, dan Klang. Kebiasaannya, penggabungan bertujuan untuk mencapai suatu bentuk sinergi yang akan menambah nilai melalui perkhidmatan cekap, pemantauan lebih menyeluruh serta dapat mengurangkan kos.

Saya yakin ia mampu seragamkan kos operasi, permit, prosedur, sekali gus memudahkan rakyat Selangor. Jika keseragaman berjaya dicapai, maka akan memudahkan serta melancarkan perniagaan.

Perkara ini amat penting kerana kawasan-kawasan yang disebutkan ini ‘touch point’ kepada peniaga terdiri pelbagai saiz.

Tidak kira besar atau kecil dan pelbagai sektor, sudah pasti penggabungan akan menyeragamkan pematuhan undang-undang.

Sudah pasti ini akan dapat meningkatkan kecekapan operasi apabila urusan-urusan yang berkait rapat proses permohonan perniagaan, pelesenian dan kelulusan dapat dipercepat. Pada masa sama, mampu mengoptimumkan sumber kerajaan dan menghapuskan pertindihan.

**Suruhanjaya Perkhidmatan Pihak Berkuasa Tempatan ditubuh bagi meningkatkan mutu perkhidmatan. Antara langkahnya menyalur dana RM145 juta untuk tingkat kualiti kemudahan jalan luar bandar. Pandangan Dr?**

Benda ini sebenarnya hampir sama dengan inisiatif Kerajaan Negeri yang disebutkan tadi, ekonomi lebih bagus maka kecekapannya lebih bagus.

Jumlah RM145 juta itu sudah tentu banyak ditumpukan pada jalan luar bandar. Bercakap tentang infrastruktur jalan raya, ini sangat penting. Melancarkan penghantaran



barang dan perkhidmatan.

Kalau jalan rosak, berlubang, sudah tentu banyak kena selenggara kenderaan. Jalan baik kurangkan penyelenggaraan. Kemalangan jalan raya juga dapat dielakkan.

Ini suatu usaha yang harus menjadi contoh kepada Kerajaan Negeri lain. Sekiranya dapat dilaksanakan dengan baik dan teratur, sudah pasti ia akan memberi keselesaan kepada penduduk.

**Sebanyak RM3 juta diperlukan untuk kajian kebolehlaksanaan Jajaran Rel Kita Selangor di pantai barat negeri. Apa boleh dicapai sekiranya projek ini dilaksana?**

Saya rasa Selangor cuba menambah baik sistem pengangkutan awam. Tentulah kajian menyeluruh dilakukan bagi memastikan dampak alam sekitar laluan rel ini tidak berkesan negatif.

Lebih banyak pengangkutan awam ia akan bantu penjimatan kos rakyat. Khususnya di kawasan Selangor mahupun Lembah Klang memang ramai gunakan kenderaan sendiri ke mana jua.

Biasanya ia sinonim di kawasan bandar. Sekarang ia diluaskan ke Kuala Selangor, Tanjung Karang, dan Sabak Bernam. Penduduk kawasan ini ke bandar memang guna kereta.

Selepas ini lebih mudah kerana ada pengangkutan awam. Projek besar sebegini sudah tentu beri limpahan ekonomi. Wujudkan populasi baharu, ada projek perumahan, rumah kedai dan pelbagai kemudahan yang akan

ditambah baik.

Idea ini sudah bagus, cuma tinggal melaksanakannya. Namun kos RM3 juta itu sudah tentu tidak cukup. Itu hanya peringkat kajian. Untuk membinanya sudah tentu lagi besar.

Tidak semua negeri mampu melaksanakan seperti Selangor. Itu kerana mereka ada profil kredit yang bagus. Pola penduduk pasti akan jadi lebih maju dan moden dengan adanya pembinaan projek perumahan dan sebagainya.

**Selangor berhasrat membangunkan Loji Tenaga Hijau Sultan Idris Shah yang mampu membakar 2,400 tan sampah sehari dan menjana 130.5 megawatt tenaga elektrik. Inisiatif dijangka mengurangkan sampah, sekali gus menjimatkan perbelanjaan negeri. Ulasan Dr?**

Berdasarkan statistik Kementerian Perumahan dan Kerajaan Tempatan (KPKT), anggaran sehari sisa pepejal di Selangor pada 2021 adalah 7,670 tan sehari.

Setahun, angka ini 2.8 juta tan. Memandangkan populasi Selangor yang terbesar di Malaysia, maka sisa pepejal ini yang tertinggi.

Justeru, usaha membangunkan Loji Tenaga Hijau suatu keperluan kerana tempat pelupusan sampah semakin berkurangan. Malah boleh tukar kepada tenaga, galakkan kitaran ekonomi penghasilan tenaga.

Pembinaan loji tenaga hijau penyelesaian bijak kerana ia bukan sahaja menyelesaikan masalah tapak

pelupusan, malah menghasilkan tenaga hijau bermanfaat kepada semua pihak, sejajar Pelan Hala Tuju Peralihan Tenaga Negara 2050 (NETR) yang dilancar Ogos tahun lalu.

Usaha ini sangat bagus sebab selesaikan isu kita hendak buang di mana lagi sisanya ini? Pada masa sama selesaikan masalah untuk dapatkan tenaga baru. Sangat bijak!

**Boleh rumuskan belanjawan kali ini?**

Jika dilihat Belanjawan Selangor berbanding negeri lain. Dasar atau langkahnya lebih mendalam. Ia bukan hanya di ‘permukaan’. Banyak inisiatif dilakukan lebih terperinci.

Namun saya berharap supaya Selangor perhebatkan lagi penyaluran maklumat kepada rakyat supaya mereka tahu bahawa Selangor ini ada macam-macam.

Contohnya penawaran untuk pemilikan rumah, pelbagai skim disediakan. Memang campur tangan kerajaan untuk pemilikan rumah ini perlu. Jadi Selangor sentiasa ke hadapan.

Sementara itu, jika bercakap tentang bantuan, kita mestilah letak kerangka yang betul. Sebolehnya jangan bantuan yang membuatkan rakyat ini selama-lamanya bergantung dengan kerajaan.

Namun saya lihat di negeri ini, bantuan untuk membolehkan rakyat jadi usahawan cukup pelbagai.

# Makmur bersama, semua merasa

Berkat kestabilan dan perpaduan Selangor, Belanjawan Selangor 2024 yang memperuntuk RM2.53 bilion membawa kemakmuran kepada semua, daripada bayi hingga warga emas.

Bertema Selangor Mandiri: Memacu Kemajuan, Memicu Perpaduan, belanjawan itu memperkenal usaha baharu termasuk melengkap jaringan pengangkutan awam, memastikan jaminan bekalan makanan, membuka peluang pekerjaan dan meraih pelaburan berteknologi tinggi.

Enakmen Lembah Klang Raya pula menyatakan pentadbiran Petaling Jaya, Subang Jaya, Shah Alam dan Klang. Rancangan membina Jajaran Rel Kita Selangor dari Klang ke Kuala Selangor bakal meningkatkan mutu pengangkutan awam.

Dalam masa sama, program kebajikan diteruskan, bahkan ditambah baik demi membela golongan rentan termasuk mahasiswa daripada keluarga berpendapatan rendah melalui pemberian buku.

Belanjawan yang menyediakan RM1.33 bilion untuk pengurusan dan RM1.2 bilion untuk pembangunan sejarah manifesto Pakatan Harapan-Barisan Nasional pada pilihan raya negeri Ogos tahun lepas. Wartawan ABDUL RAHIM SABRI menyusun semula manfaat mengikut kumpulan sasar.



## WANITA

### PROGRAM DAN AKTIVITI WANITA BERDAYA SELANGOR (WBS) RM4 JUTA

- badan pemikir jalan kajian dan dasar bantu wanita

## KANAK-KANAK

### SARINGAN PERKEMBANGAN KANAK-KANAK RM350,000

- kenalpasti perkembangan anak usia 3-5 tahun keluarga B40

### BANTUAN SUBSIDI YURAN KAFA-I RM5 JUTA SEKALI BAYAR ①

- subsidi yuran RM30 sebulan murid B40
- tempung utiliti, sewa, internet, naik taraf premis, elauan guru rakyat

### SKIM ASUH PINTAR RM600,000

- subsidi bulanan RM100 kepada taska awam
- anak bawah 4 tahun keluarga B40

## SKIM BANTUAN TADIKA SELANGOR (TUNAS) RM2 JUTA

- subsidi bulanan RM50 kepada tadika berdaftar
- anak umur 5 dan 6 tahun

## ILTIZAM ANAK SELANGOR RM3 JUTA

- tabungan RM500 akaun SSPN Prime dalam lima tahun
- deposit boleh keluar umur 18 tahun
- sasaran 30,000 kanak-kanak lahir 2022 ke atas



## PELAJAR SEKOLAH

### BANTUAN SEKOLAH NEGERI SELANGOR RM26.5 JUTA

- baiki infrastruktur, persekitaran kondusif

### PROGRAM TUISYEN RAKYAT SELANGOR (PTRS) RM10 JUTA

- tuisyen percuma calon SPM seluruh Selangor

## PEMBUDAYAAN SAINS DAN INOVASI RM2 JUTA

- bangunkan bakat murid dalam sains, teknologi, kejuruteraan dan matematik (STEM)

## MAHASISWA

### PEMBANGUNAN MAHASISWA SELANGOR RM24.9 JUTA ②

- biaya pembangunan pendidikan tinggi dan IPT Selangor
- bucar buku 1,000 mahasiswa B40 dan asnaf



### PUSAT PEMBANGUNAN KEMAHIRAN TEKNIKAL SELANGOR (STDC) RM13.85 JUTA

- program kemahiran, vokasional lahir pekerja mahir

### BANTUAN ASAS YURAN UNIVERSITI (BAYU) RM5 JUTA

- bantuan yuran RM500 hingga RM1,000
- untuk 2,500 pelajar daripada B40 dan M40

### TABUNG KUMPULAN WANG BIASISWA KERAJAAN NEGERI RM9 JUTA

- biaya anak Selangor di universiti dalam atau luar negara

### HADIAH PENGAJIAN IPT RM3 JUTA

- insentif RM1,000 siswa ke IPT awam atau swasta

### PEMERKASAAN IPT KERAJAAN NEGERI RM9 JUTA

- perkasa infrastruktur, pentadbiran dan kompetensi IPT

### NAIK TARAF ASRAMA SELANGOR DI MESIR RM200,000

- asrama untuk keselesaan 156 siswa Selangor di Mesir

### TABUNG AMANAH PEMBANGUNAN DAN PENGURUSAN PELAJAR TIMUR TENGAH RM5 JUTA

- tabung wakaf beli Rumah Selangor ke-2 di Mesir. ▶



1

## ORANG KURANG UPAYA (OKU) DAN WARGA EMAS

**BANTUAN KHAS ANAK ISTIMEWA SELANGOR (ANIS) RM1 JUTA**



- bantuan urus anak OKU bawah 18 tahun

**DASAR EKONOMI PENJAGAAN NEGERI SELANGOR RM1 JUTA**

- dana sedia dan laksana Dasar Ekonomi Penjagaan
- upah penjaga kanak-kanak, warga emas dan OKU di pusat penjagaan

## KEBAJIKAN KUMPULAN B40

**BANTUAN KEHIDUPAN SEJAHTERA SELANGOR (BINGKAS) RM108 JUTA ①**

- bantuan RM300 e-dompet kepada 30,000 keluarga
- beli barang asas dan alat pendidikan anak

**BAUCAR JOM SHOPPING RM16.48 JUTA**

- baucar RM200 perayaan utama
- sasar 82,400 orang pendapatan bawah RM3,000

**SKIM MESRA USIA EMAS, INSAN ISTIMEWA RM37.5 JUTA**



- baucar beli belah RM150 untuk warga emas, insan istimewa
- khairat kematian RM500 kepada waris

**BLUEPRINT PEMBASMIAN KEMISKINAN RM2.1 JUTA**

- bantuan alatan penjaja, peniaga atau kerja sendiri
- Karnival Blueprint untuk pasar produk

**ORANG ASAL RM2.5 JUTA**

- naik taraf infrastruktur sekolah
- bina, baiki dan naik taraf rumah daif
- selesaikan isu warta tanah kampung

**DANA BANTUAN GUAMAN SELANGOR RM1 JUTA**

- subsidi kos guaman RM3,000 kepada B40
- meliputi kes syariah isu keluarga dan perkahwinan

**BANTUAN RUMAH KERAJAAN PRIHATIN RM2 JUTA**

- bantuan baiki dan bina rumah baru



**PROGRAM PENGURUSAN MASJID RM2 JUTA**

- naik taraf 20 masjid kariah ke masjid pengurusan

**AKADEMI LITERASI AL-QURAN RM1 JUTA**

- pengajian bersjil di Gombak dan Sabak Bernam
- perkasa program masjid di daerah Petaling

**PERKASA INSTITUSI FATWA RM500,000**

- untuk laksana penyelidikan dan kajian Jabatan Mufti

**NAIK TARAF KEMUDAHAN DAN KESELESAAN MASJID RM700,000**

- baiki 14 masjid di lokasi jalan utama

**TENAGA MAHIR DAN USAHAWAN**

**MAJLIS KEMAHIRAN & PEKERJAAN SELANGOR RM1 JUTA**

- untuk kenal pasti, tawar tenaga kerja mahir industri

**LIGA USAHAWAN WANITA DAN SELANGOR YOUTH COMMUNITY RM3.3 JUTA**

- bantuan niaga, urusan kewangan dan pemasaran produk mikro, kecil dan sederhana.

**JAMINAN MAKAN RM50 JUTA**

- kukuh stok bekalan makanan seperti beras, ikan dan daging
- projek klusterisasi tanaman dan produk hiliran setiap daerah
- guna teknologi hidroponik, akuaponik, penanaman vertikal

**PENGUKUHAN PEMANTAUAN PELAKSANAAN DAN PRESTASI SELANGOR (SIAP) RM1 JUTA**

- pembangunan sistem pengurusan projek lebih cekap
- laporan berkala lebih kerap dihantar termasuk tambah pegawai

**PERUMAHAN RAKYAT**

**SKIM SMART SEWA TAMBAHAN RM 220 JUTA**

- bantuan sewa rumah rakyat B40 dan M40
- sasar 810 unit

**PENYELESAIAN PROJEK TERBENGKALAI RM18 JUTA**

- pulih projek perumahan terbengkalai di Selangor

**PASUKAN PETUGAS HAK MILIK STRATA RM200,000**

- selesaikan isu tiada hak milik strata pangsapuri

**RUMAH SELANGORKU ③**

- bina 200,000 rumah dalam lima tahun



**PEMAIN INDUSTRI DAN EKONOMI**

**PUSAT KECERDASAN BUATAN SELANGOR RM1 JUTA**

- kerjasama syarikat pakar tarik pelaburan dan peluang kerja

**PEMBANGUNAN DRON SELANGOR RM2 JUTA**

- pemain utama terokai industri bangun dron
- kerjasama anak syarikat SELATI dengan Turkish Aerospace (TUSAS)

**SIDANG KEMUNCAK PERNIAGAAN ANTARABANGSA SELANGOR (SIBS) RM20 JUTA ④**

- promosi pelaburan utama rantau Asia Tenggara
- tambah nilai dengan industri ekonomi kreatif

**PAMERAN UDARA SELANGOR (SAS) RM8 JUTA**

- industri perniagaan penerbangan dianjur setiap dua tahun
- antara tumpuan sektor keselamatan, pertahanan, pembangunan dron



**PEMBANGUNAN SERANTAU BERSEPADU DI SELATAN SELANGOR (IDRISS)**

- pembangunan serantau bersepadu selatan Selangor
- bina Taman Industri Internet Kebendaan (IEP) lengkap jalur lebar RM6 juta
- Pulau Carey sebagai pelabuhan ketiga
- Taman Aero Selangor konsep hijau tumpu industri senggara, baik pulih, pasang, pembuatan, latihan, pekerja mahir penerbangan hijau
- taman industri terselia (MIP) galak kawasan industri baharu

**PEMBANGUNAN KAWASAN SABAK BERNAM (SABDA) RM76 JUTA**

- tawar 3,000 peluang pekerjaan
- laksana projek industri hilir hasil laut dan agro makanan Sungai Lang
- industri ternakan ikan dan kemudahan proses hasil laut
- kompleks lengkap fasiliti jual ikan, pembungkusan, sejuk beku, bengkel senggara bot

**PEMBANGUNAN SEKTOR SAINS HAYAT**

- kerjasama dengan IPT, institusi penyelidikan dan



pemain industri

- bidang perubatan, farmaseutikal, bioteknologi, produk kosmetik dan penjagaan diri

**PENGHUNI BANDAR**

- perkenal Enakmen Lembah Klang Raya RM2 juta
- bangun sistem e-pelelong dan tender, doket pintar urusan lelongan, tender dan bahan batuan RM6 juta
- rizab tambahan pihak berkuasa tempatan 10 peratus untuk prasarana
- Projek Selangor Penyayang tingkat kemudahan awam 56 DUN RM24 juta

**PELANCONG**

**INDUSTRI HALAL RM3 JUTA**

- anjur Selangor International Halal Convention (SELHAC) 2024
- Selangor platform utama Nusantara sektor halal
- fokus inovasi digital halal, rangkaian bekalan logistik, pensijilan halal

**TAHUN MELAWAT SELANGOR 2025 RM3.3 JUTA**

- pakej pelancongan khas bagi pelancong Asia, Eropah

'Pusing Selangor Dulu' dan teknologi digital pelancongan maya

**PROJEK TAMAN GEO GOMBAK - HULU LANGAT RM2 JUTA**

- Sasar ikiraf UNESCO Global Geopark melalui kajian saintifik, bangun prasarana serta geo-pelancongan

**PENGUNA PENGANGKUTAN DAN KEMUDAHAN AWAM**

**JALAN RAYA DAN INFRASTRUKTUR RM145 JUTA**

- kemudahan infra, jaringan lebih luas antara bandar dan daerah

**JAJARAN REL KITA SELANGOR RM3 JUTA**

- kajian kebolehlaksanaan rel Klang ke Sabak Bernam

**PROJEK TEBATAN BANJIR, PENGAIRAN, UTILITI**

- urus pengairan, saliran dan tebatan banjir RM133 juta
- saluran khidmat bersih Pulau Indah RM300 juta

**MOBILITI SELANGOR**

- pengangkutan van, bas mini, Bas Smart Selangor RM5 juta
- bina laluan pejalan kaki selesa dan selamat RM3 juta

**PENCINTA ALAM SEKITAR**

**PRASARANA KENDERAAN ELEKTRIK RM1 JUTA**

- 1,000 unit stesen cas kenderaan elektrik
- bina laluan hijau, guna dua bas elektrik

**DASAR DAN PELAN TINDAKAN PERUBAHAN IKLIM RM300,000**

- laksana dasar adaptasi, mitigasi dan urus risiko perubahan iklim

**PROGRAM TANAM 11 JUTA POKOK RM400,000**

- pulihara, hijau semula hutan yang diteroka
- kekalkan 31 peratus Hutan Simpan kekal

**ADAKAN PUSAT ADAPTASI PERUBAHAN IKLIM RM800,000**

# Pencari kebenaran

**A**dalah baik untuk dimulakan dengan versi ringkas tentang apa diperkatakan dalam karya bersifat autobiografinya iaitu al-Munqidh min al-Dhalal (Penyelamat daripada Kesesatan).

Al-Ghazali mengatakan beliau menganggap pencari kebenaran terbahagi kepada empat kelompok iaitu ahli kalam, Batiniyah, filsuf dan ahli sufi; dan beliau meneruskan untuk mempelajari pandangan setiap kelompok secara mendalam demi menemukan kebenaran buat dirinya.

Kesangsiuan al-Ghazali yang didasari falsafah ditunjukkan oleh kenyataan bahawa beliau mengaitkannya dengan pertimbangan terhadap hakikat ilmu dan kepastian.

Penggunaan akal yang dikritik al-Ghazali kebanyakannya adalah yang digunakan dalam ilmu kalam.

Hal ini digambarkan lewat contoh yang beliau gunakan, tentang seseorang yang cuba membuktikan terdapat tiga yang lebih besar daripada sepuluh menerusi keajaiban. Inilah kaedah hujah yang digunakan dalam ilmu kalam Islam.

Menurut ahli kalam, seorang nabi datang kepada umatnya bersama risalah daripada Tuhan dan mengatakan kepada mereka, “Ini risalah Tuhan, dan buktinya daripada Tuhan adalah sekian-sekian mukjizat akan berlaku.”

Asasnya ialah keajaiban yang melibatkan pelanggaran dalam susunan alam hanya boleh dihasilkan oleh kuasa ghaib.

Tuhan menghasilkan pelanggaran aturan biasa untuk mengesahkan dakwaan nabi-nabi tulen yang diutusnya; tetapi jika seseorang berbohong mengatakan dia mendapat wahyu daripada Tuhan, ia tidak akan dapat dibuktikan melalui mukjizat.

Dalam kata lain, kesangsiuan al-Ghazali tentu sebagiannya disebabkan kesedaran bahawa hujah akal yang mendasari ilmu kalam tidak sepenuhnya bersifat akal, tetapi bergantung kepada banyak andaian yang tidak mampu diabsahkan secara munasabah.

## Darjat tertinggi


Ada percanggahan mendasar dalam pandangan ahli falsafah. Ibnu Sina sampaikan menyebut “daya melampaui” (quwwah qudsiyyah) nabi adalah “darjat tertinggi antara darjat kemampuan manusia”; dan ini seakan mengisyaratkan bahawa nabi adalah puncak pencapaian manusia.

Namun ajaran falsafah tentang ketujuan akal bercanggah dengan dakwaan ini. Jika akal paling tinggi, bagaimana nabi boleh menjadi manusia sempurna berbanding filsuf? Jika nabi paling tinggi, bagaimana dalil akal falsafah boleh digunakan untuk menilai kata-katanya?

Seperti disebut al-Ghazali, sang filsuf telah tenggelam oleh kepalsuan pencapaianannya dalam “menganggap bahawa perkara-perkara ketuhanan boleh sepenuhnya tertakluk kepada pemikiran dan khayalinya.”

Dari pada segala alasan dan sebab ini, jika hujahnya masuk akal, pada akhirnya kesangsiuan al-Ghazali kebanyakannya adalah kegundahan tanpa sedar terhadap keadaan semasa teologi akal.

Paling tidak, falsafah telah menyumbang peningkatan kegundahan, dan menumpukannya



pada teologi akal yang tidak sempurna.

Tetapi pasti ada sesuatu dalam ilmu kalam sendiri atau dalam kalangan ahli kalam yang awalnya membuatkan al-Ghazali melayan kesangsiuan sedemikian.

Beliau telah dididik untuk berkerjaya sebagai fuqaha (sebagai ahli kalam cuma salah satu cabang dari kerjaya umumnya—beliau turut mengarang sebuah dua kitab tentang hukum).

Oleh itu kesangsiannya pasti bermaksud beliau benar-benar meragui kerjayanya. Adakah disebabkan kelemahannya sendiri?

Tidak, kelemahannya adalah beliau cuma terlalu jujur menghadapi dunia yang durjana. Walau bagaimanapun, apa yang berlaku kemudiannya dan analisis terhadap kritikannya ke atas fuqaha pada zamannya jelas menunjukkan tidak ada kegundahan peribadi yang menjadi penyebab kesangsiannya.

Anggapan punca kegundahan al-Ghazali adalah kegagalan dalam beberapa hal oleh para fuqaha.

Sebagai seorang pemuda penuh bersemangat serta ada hubungan dengan gerakan kebangkitan keagamaan (dari segi luaran) yang diajukan Nizam al-Mulk, beliau tertanya-tanya bagaimana negara itu dapat ditambah baik, dan beliau mendapati sumber-sumber tradisi ilmu kalam sangat tidak mencukupi.

Kesangsiannya mungkin dilihat sebagai penzahiran ketidakupayaan akal (atau perancangan manusia) untuk memperbetul keadaan.

Seajar penafsiran ini seperti yang diterangkannya, penyelesaian kemelut tidak ditemukan pada usaha manusia tetapi daripada “cahaya yang disuluhkan Allah ke dadaku.”

Manusia melakukan apa yang termampu, tetapi menyedari ketidakmampuannya untuk

meneruskan dan kemudian, ketika dia berhenti kerana bingung, sesuatu di luar dirinya menempatkan kakinya ke depan di jalan baru. Cahaya itu tidak dijelaskan al-Ghazali.

Namun, dalam bahagian lain al-Munqidh min al-Dhalal, beliau menyebut apabila mendekati pengajian tasawuf, beliau sudah memiliki keimanan kukuh kepada Tuhan, kenabian dan Hari Akhirat.

## Pencerahan

Ini mungkin bukan bentuk yang tepat yakni pencerahan yang mengakhiri kesangsiuan datang kepadanya, tetapi ia mungkin natijah daripada pencerahan itu.

Ada banyak petunjuk kecil yang menunjukkan kegundahan al-Ghazali pada asasnya merupakan suatu perasaan bahawa tamadunnya berhadapan kemelut dan penyelesaiannya tidak ada di tangan atau di depan mata.

Setelah kebah daripada kesangsiannya, beliau memulakan pencarian kebenaran dengan meneliti ajaran empat kelompok utama “pencari kebenaran”; hal ini menunjukkan bahawa beliau membayangkan dirinya dan golongan tersebut kekurangan beberapa fasal penting daripada kebenaran.

Judul kitabnya, al-Munqidh min al-Dhalal, mungkin mendatangkan rujukan sosial atau peribadi, juga memberi petanda bahawa masyarakat semacam telah menyimpang.

Dan tidak salah jika disebut bahawa judul kitab terulungnya, Ihya’ Ulumiddin adalah tanggapan terhadap kemerosotan atau kereputan dalam ilmu agama.

Matlamat utama pengkajian buku ini adalah untuk menemukan apakah kemerosotan itu. Barangkali sudah cukup semua yang disebutkan sebelum ini untuk menunjukkan al-Ghazali terlibat dalam ketegangan pada zamannya.

Fasal yang diberi perhatian dalam bab ini adalah saingenan antara dua sistem pendidikan, masing-masing berusaha menyediakan gagasan asas untuk seluruh masyarakat.

Tiap satunya mempunyai kelebihan nyata dan kelebihan yang bagus. Akhirnya apa yang baik pada mereka adalah saling melengkap, tetapi masing-masing cenderung untuk mendakwa mereka cukup mampu diri dan memperkecil atau menolak sumbangan pesaingnya.

Al-Ghazali tidak cuba melepaskan diri daripada ketegangan ini. Sebaliknya beliau benar-benar memasukinya sehingga merasakannya secara mendalam dalam dirinya.

Tempoh kesangsiuan adalah sudut dalam proses menyelesaikan ketegangan luaran dengan memasukinya.

Melalui tindakan sukarelanya menerima sebarang ketegangan ke dalam dirinya, al-Ghazali berupaya menemui penyelesaian ketegangan yang mengesankan seluruh zaman Islam selepas itu.

*Petikan muka surat 42–50 buku Imam Al-Ghazali: Hayat dan Jasa Ilmuwan Ulung terjemahan buku Muslim intellectual – A study of al-Ghazali tulisan W. Montgomery Watt. Ia boleh dibeli melalui bukuibde.com atau toko Rencana di Bandar Sri Damansara, Petaling Jaya.*

# Ungkai Ashabul Kahfi



**MARWAN BUKHARI A HAMID**  
ialah penulis dan penterjemah.  
Lulusan Universiti Yarmouk,  
Jordan dan Universiti  
Sains Islam Malaysia

Tujuan utama membaca al-Quran untuk dihayati dan diamalkan pengajaran daripada sesuatu ayatnya sama ada yang berbentuk kisah, perumpamaan, sumpah dan sebagainya.

Al-Quran tidak meminta kita mengkaji secara terperinci tentang perkara yang didiamkan oleh al-Quran. Banyak sekali perkara yang didiamkan termasuklah siapakah Ashabul Kahfi yang disebut dalam surah al-Kahf.

Kata Imam Ibn 'Abdil Salam dalam Majaz al-Quran:

"Tujuan penafsiran al-Quran adalah untuk mencapai objektifnya yang membawa manfaat bagi hal-hal keagamaan. Sementara itu mengetahui secara terperinci berkenaan bahagian anggota yang dipukul (kisah al-Baqarah: 73), tentang kampung yang diperintahkan agar dimasuki oleh Bani Israel (al-Baqarah:58), siapa yang disamakan rupanya dengan Nabi Isa kemudian disalibkan (al-Nisa': 157), dan jumlah pengikut Firaun ketika mengikuti Nabi Musa; semua ini ialah perkara-perkara yang tidak menjadi keperluan atau kepentingan untuk diketahui."

Justeru, fokus seseorang muslim membaca al-Quran ialah pengajaran daripada semua ayat. Mengkaji perkara yang didiamkan tidak salah, asal pengajaran yang dibawa dihayati kerana itulah tujuannya diturunkan.

Salah satu isu berkaitan perkara yang didiamkan ialah adakah Ashabul Kahfi pengikut ajaran Nabi Isa? Para ulama berbeza pandangan tentang hal ini:

Pandangan pertama menyebut ia berlaku sebelum zaman Nabi Isa AS. Alasannya, soalan tentang Ashabul Kahfi ditanya agamawan Yahudi. Mereka hanya bertanya tentang kelompok mereka dan tidak bertanya tentang Kristian kerana permusuhan antara mereka dengan ajaran Kristian.

## Bawa anjing

Menurut seorang ulama tabiin terkenal, Wahb Munabbih:

"Mereka ialah pemuda dari Rom yang masuk ke gua sebelum kelahiran Nabi Isa. Setelah baginda diutuskan, baginda menyebut kisah mereka. Kemudian Allah membangunkan

pemuda-pemuda itu dari tidur panjang mereka di antara zaman al-Masih dan Nabi Muhammad SAW." (al-Ma'arif, Imam Ibn Qutaybah)

Imam Ibn Kathir berpandangan peristiwa itu berlaku sebelum kelahiran Nabi Isa. Alasannya, soalan itu daripada kelompok Yahudi sebagaimana asbab penurunan ayat surah al-Kahf itu.

Kelompok Yahudi tidak mengambil berat tentang Kristian kerana perbezaan antara Yahudi dan Kristian. Namun, Ibn Kathir turut menukil pandangan ulama yang menyebut Ashabul Kahfi sebagai pengikut ajaran Nabi Isa.

Imam Ibn 'Ashur juga menyebut kecenderungannya bahawa peristiwa itu berlaku sebelum ajaran Nabi Isa mengambil kira hujah sebab penurunan ayat itu. Ibn 'Ashur menyebut di Tunisia ada gua yang menjadi tempat persembunyian orang Yahudi yang ditindas Rom Carthage berdasarkan kajian beberapa pendeta Kristian di sana.

Ibn 'Ashur juga menyebut gua menjadi pilihan golongan Kristian yang ditindas dan turut membawa anjing untuk tujuan keselamatan. Kalau mati, mereka ditanam di gua itu. Boleh jadi kalau dibunuh, penindas menguburkan mereka di situ juga. Di Roumeh (Lubnan) juga ada gua besar seumpama ini.

## Ajaran Yahudi

Mungkin ini faktor terdapat perbezaan lokasi gua kerana ada banyak kes penindasan. Akhirnya, hanya ada satu yang betul-betul tepat sebagaimana kisah Ashabul Kahfi dalam al-Quran.

Pandangan kedua pula menyebut peristiwa itu berlaku selepas zaman Nabi Isa, sekitar abad ketiga. Ibn 'Ashur semasa menyebut pandangan ini mengiranya berlaku sekitar 237 Masihi.

Imam al-Qasimi pula menukil pandangan Maximos Mazlom, seorang Patriark Katolik Rom. Berdasarkan itu, sumber sejarah Kristian menyatakan peristiwa berlaku sekitar 252 Masihi.

Ibn Athir dalam al-Kamil fi al-Tarikh menyebut peristiwa Ashabul Kahfi berlaku pada zaman Raja Dikyus atau Dikyanus. Mereka tinggal di bawah pemerintahan Rom yang bernama Efesus. Rajanya menyembah berhala tetapi mereka mengikuti ajaran Nabi Isa.

Kajian Dr Ahmad Majzub berjudul Ahl al-



Kahf fi al-Taurah wa al-Injil wa al-Quran pula menyimpulkan kisah Ashabul Kahfi tiada dalam sumber Yahudi. Ini kerana pemuda itu asalnya pengikut ajaran Yahudi yang beriman dengan Nabi Isa, sedangkan kelompok Yahudi umumnya menentang ajaran baginda.

Sumber sejarah Kristian ada menyebut kisah ini, antaranya karangan Eutychius of Alexandria atau dikenali di dunia Arab sebagai Said Bitriq. Beliau menyebut semasa lapan tahun pemerintahan Theodosius I, pemuda-pemuda itu melarikan diri daripada Raja Dikyus dengan bersembunyi di gua di Efesus.

Mereka tertidur yang disangka satu malam sahaja, tapi tidur bertahun-tahun lamanya sebelum akhirnya bangun dan segalanya berubah.

Kesimpulannya, ada perbezaan pandangan dalam kalangan ulama tafsir dan sejarah Islam mengenai hal ini sama ada mereka pengikut ajaran Nabi Isa atau tidak. Pandangan yang menyebut mereka pengikut ajaran Nabi Isa pun banyak.

Bagi yang menerima mereka mengikuti ajaran Nabi Isa, tidak salah untuk menyebutnya sebagai ajaran Kristian. Asal sahaja menyebutnya sebelum berlaku penyelewengan, bukannya selepas terjadi penyelewengan.

Tambahan pula, menurut kajian Pejabat Mufti Wilayah Persekutuan:

"Perkataan christ memiliki maksud yang sama dengan perkataan al-masih dalam bahasa Hebrew yang bermaksud Rasul yang dipilih dan ia disebutkan dalam al-Quran. Oleh itu, mengatakan bahawa Ashab al-Kahfi adalah beragama Kristian tidak menjadi kesalahan."

Perselisihan dalam hal ini aspek lebih terkait soal pengukapan, kerana yang menyebut sebagai pengikut Kristian tentulah bermaksud sebelum berlaku penyelewengan. Yang lebih penting, kita menghayati pengajaran kisah tersebut demi menjadi muslim yang lebih baik.



# Catan bawah sedar

Oleh MUHD SYAFIQ FAWWAZ

MUHD ABDUL AZIZ

Illustrasi FAHMI MUSTAFFA

**A**liran seni surrealisme adalah gaya seni lukis dan sastera moden yang pesat dibangunkan di kota Paris selepas Perang Dunia Pertama. Surrealisme bermaksud 'melampaui realisme' atau 'melebihi alam realiti'. Ia gerakan para intelektual kesusasteraan dan seni lukis yang telah diasaskan oleh penulis dan penyair Andre Breton (1896-1966) pada tahun 1924.


Seniman aliran ini menggunakan perkataan surrealisme kerana mereka percaya alam mimpi tidak berbeza daripada alam realiti, malah alam mimpi lebih nyata. Sesetengah imej dan subjek dalam karya yang dihasilkan kelihatan seperti sesuatu yang mustahil berlaku dalam kehidupan realiti kerana hanya berlaku dalam alam mimpi. Suatu kepercayaan baru bagi para seniman surrealisme, pelukis tidak lagi memikirkan apa yang mereka lukiskan. Mereka hanya membiarkan pensil atau berus berjalan-jalan di tangan mereka secara automatik untuk melihat apa yang akan berlaku dalam karya.

Paling penting, seniman surrealisme menyukai apa-apa yang kelihatan ajaib, luar biasa atau mengejutkan. Misalnya, catan manusia tanpa wajah, atau kombinasi objek yang aneh.

Selain mimpi, seniman aliran surrealisme berminat dengan elemen kegilaan, memori, peluang dan kebetulan. Mereka suka memilih objek harian dalam tetapan yang tidak dijangka, dan menggabungkan idea serta imej yang jelas sangat berbeza. Sebagai contoh, objek semula jadi seperti buah dan haiwan boleh digabungkan menjadi bentuk abstrak. Para seniman aliran ini berusaha untuk meninggalkan pemahaman logik akal antara batasan normal dengan wadah yang lebih fantastik. Visual tentang visi mimpi ngeri, atmosfera yang tidak harmoni serta tidak sesuai dengan kewujudan manusia di alam realiti, diterjemahkan ke dalam karya.

## Pemberontakan fikiran

Kelahiran aliran seni ini dalam kesusasteraan dan seni lukis juga memperlihatkan elemen yang tidak rasional, paradoksikal serta absurd. Di samping itu, aliran ini lahir dari pemberontakan dan pemikiran seniman aliran sebelum itu iaitu Dadaisme. The Surrealist Manifesto yang ditulis oleh Andre Breton telah diterbitkan pada tahun 1924 dan diterbitkan untuk kali kedua pada tahun 1930. Menurut Andre Breton, beliau berpendapat seni seharusnya beralih daripada realiti peperangan, politik dan daya kerja yang membebangkan. Sebaliknya, Andre Breton percaya mimpi elemen paling penting dalam penghasilan sesuatu karya seni juga dalam



konteks kehidupan. Andre Breton memberikan penekanan kepada analisis dan simbol mimpi yang diperkenalkan oleh Sigmund Freud dalam bukunya 'The Interpretation of Dreams' (1899).

Dari sudut intelektual, Sigmund Freud figura penting dan berpengaruh dalam perkembangan aliran seni surrealisme. Beliau meneroka akal bawah sedar dan alam mimpi untuk terapi kejiwaan. Oleh sebab itu, seniman aliran surrealisme terpesona dengan konsep akal bawah sedar sebagai medan khayalan dan mengaplikasikan teori Freudian sebagai cara untuk memanifestasikan peristiwa yang berlaku dalam akal bawah sedar.

Maka, aliran seni ini turut mengambil sudut pandang daripada teori Psikoanalisis yang diasaskan oleh Sigmund Freud. Hakikatnya, Sigmund Freud tidak menghargai karya seni seniman surrealisme, Walau bagaimanapun, mereka menyatakan pentingnya akal bawah sedar, halusinasi, mimpi serta keberadaan dalam keadaan khayal boleh memberi inspirasi dalam menghasilkan karya. Seniman surrealisme tertarik dengan idea bawaan Sigmund Freud mengenai kegelisahan ('anxiety'), 'fetishes', 'the uncanny' serta bagaimana memanifestasikan diri secara simbolik dalam alam mimpi. Seterusnya, apresiasi seni melibatkan disiplin ilmu dan pemahaman tentang keseluruhan proses seni itu sendiri. Penglibatan antara seniman, karya dan apresiasi seni adalah jaringan yang amat penting.

## Obses memori

Seniman Perancis, Raymond Georges Yves Tanguy (disebut 'tong-ee'), dilahirkan di kota Paris pada 5 Januari, 1900. Yves Tanguy memulakan kerjaya sebagai pelukis pada usia 22 tahun. Segalanya bermula seakan magis setelah beliau melihat dua catan cat minyak milik Giorgio de Chirico. Salah satu karya catan de Chirico yang membuatkan Tanguy terpegun adalah 'The Child's Brain'. Karya catan Tanguy mempunyai subjek dan bentukan organik yang terdampar pada permukaan landskap tandus. Makhluk-makhluk berbentuk seperti amorfus juga menonjol dalam karya-karyanya. Simbolisme dalam karya-karya catan Tanguy bersifat peribadi dan surrealistik.

Malahan, cerminan obsesinya terhadap memori waktu kecil, mimpi, halusinasi dan pengalaman psikosis diterjemahkan ke dalam karya catan cat minyak. Andre Breton berpendapat signifikan karya-karya catan surrealisme Yves Tanguy kerana perihal penolakannya untuk berkompromi dan ada ketikanya beliau seperti menyimpan rahsia. Sementara itu, karya catan landskap alam mimpi

Yves Tanguy mempunyai keseimbangan antara realisme dan fantasi. Seperti kelaziman seniman surealis, Yves Tanguy membebaskan akal bawah sedarnya untuk menghasilkan catan metafizikal hasil terjemahan alam mimpi yang sarat enigma dan misteri.

Karya-karya catan beliau antaranya ialah seperti 'Mama, Papa is Wounded!' (1927), 'The Dark Garden' (1928), 'Day of Slowness' (1937), 'The Five Strangers' (1941) dan 'Indefinite Divisibility' (1942). Kesimpulannya, seperti juga seniman seangkatan dari aliran Surrealisme antaranya Salvador Dali, Max Ernst dan Joan Miro, Yves Tanguy juga telah memberikan sumbangan kepada perjalanan dunia Seni Modern.

Justeru, apresiasi terhadap karya-karya catan Yves Tanguy adalah seperti memberikan penghayatan kepada karya seni yang dihormati. Disiplin dalam menghargai karya seni catan telah diperkenalkan melalui Sejarah Seni dalam membimbing penghayat untuk membuat apresiasi. Beberapa aspek seperti estetika, semiotik, ikonografi dan psikologi dapat membantu dalam membuat penghargaan dan membaca sebuah karya catan. Akhir sekali, melalui apresiasi seni, karya catan dapat dihargai bukan hanya dari aspek formalisme, malah dapat ditinjau daripada sudut psikologi.

*Cerpen, esei dan sajak boleh diikuti pada setiap minggu menerusi pautan [selangorkini.my/category/renanca-bm/](http://selangorkini.my/category/renanca-bm/)*



Anwar meninjau pameran selepas merasmikan portal Kecerdasan Buatan Untuk Rakyat di Universiti Putra Malaysia Serdang, Subang Jaya pada 16 Januari. Foto Bernama

Sedia portal percuma

# Peluang rakyat belajar teknologi AI

Oleh SOFIA NASIR

**SUBANG JAYA** - Kerajaan serius untuk meningkatkan tahap celik digital dalam kalangan masyarakat termasuk penggunaan teknologi kecerdasan buatan (AI) yang semakin meluas.

Perdana Menteri Datuk Seri Anwar Ibrahim berkata portal AI Untuk Rakyat yang diperkenal permulaan baik dan boleh dimanfaatkan terutama pelajar pada setiap peringkat.

"Kita serius dalam transformasi digital.

## Sokong heret Israel ke mahkamah

**SHAH ALAM** - Malaysia mengulangi pendirian mendukung langkah Afrika Selatan di Mahkamah Jenayah Antarabangsa dalam menegakkan keadilan di Palestin dan mengecam kezaliman Israel.

Perdana Menteri Datuk Seri Anwar Ibrahim berkata tindakan itu disokong seluruh dunia dan Israel mesti dibicarakan manakala kekejaman mereka mesti diatiaskan dengan pelbagai cara.

"Negara-negara Barat seolah-olah ingin terus bermuka-muka dan mengambil pendirian selamat ketimbang

Kita tidak ada pilihan selain memastikan rakyat menyedari sepenuhnya apa yang saya sebut sebagai celik digital dan celik AI.

"Kita ada aplikasi (AI Untuk Rakyat) dan kita boleh mulakan dengannya. Ia hanya pengenalan asas mengenai teknologi AI, dan pelajar boleh cuba memulakannya," katanya.

Beliau berkata demikian dalam sidang media selepas melancarkan portal AI Untuk Rakyat di Universiti Putra Malaysia (UPM) pada 16 Januari. Turut hadir, Menteri Ekonomi Rafizi Ramli.

Menyedari kebimbangan penggu-

naan teknologi AI bakal menggantikan tenaga manusia, Anwar berkata kepercayaan iman dan kekuatan jati diri benteng pertahanan asas individu.

"Ini (AI) tidak harus menakutkan. Seperti kita perkenal komputer dulu. Benteng pertahanan kita, iman, mental, dalam dan sistem pendidikan kita terutama di rumah," katanya.

Portal itu boleh diakses percuma dalam empat bahasa iaitu bahasa Melayu, Inggeris, Mandarin dan Tamil bagi membantu orang ramai mempelajari teknologi AI secara kendiri.

membunuh 24,100 rakyat tidak berdosa dan rejim itu terus dipencil masyarakat antarabangsa.

Anwar berkata gelombang penentangan terhadap Israel adalah yang terbesar sejak demonstrasi raksasa menentang Perang Vietnam dan pencerobohan ke atas Iraq serta Afghanistan sebelum ini.

Menjelaskan dunia menyaksikan 100 hari pembantaian terhadap penduduk Palestin sejak 7 Oktober, beliau berkata bantahan itu kesinambungan lebih tujuh dekad kezaliman Israel.

## Kadar pengangguran makin turun

**SHAH ALAM** - Kadar pengangguran kembali pada paras prapandemik iaitu 3.3 peratus atau 569,200 penganggur berbanding 3.4 peratus pada Oktober, menurut Jabatan Perangkaan Malaysia (DOSM).

Ketua Perangkaan Datuk Seri Dr Mohd Uzir Mahidin berkata angka pada November membawa isyarat pertumbuhan ekonomi positif berikutan pertambahan bilangan penduduk bekerja, lapor Bernama.

"Bilangan tenaga kerja pada November 2023 meningkat 0.2 peratus bulan ke bulan kepada 17 juta orang daripada 16.97 juta orang pada Oktober," katanya dalam kenyataan pada 11 Januari.

Seramai 16.43 juta penduduk bekerja berbanding 16.40 juta pada Oktober sekali gus angka pengangguran turun 0.3 peratus kepada 569,200.

## 1,000 anak Palestin parah dalam 100 hari

**SHAH ALAM** - Lebih 1,000 kanak-kanak Palestin terpaksa dipotong sebahagian anggota tubuh akibat cedera parah diserang rejim Israel di Semenanjung Gaza dalam tempoh 100 hari lalu.

Menurut Tabung Kanak-Kanak Pertubuhan Bangsa-Bangsa Bersatu (Unicef), bantuan kemanusiaan terlalu sedikit dan ada pesakit yang meninggal dunia kerana kekurangan bekalan ubat-ubatan.

"Risiko yang tidak boleh diterima ini berlaku pada ketika sistem makanan dan kesihatan di Semenanjung Gaza sedang di ambang keruntuhan," kata jurucakapnya James Elder.

Katanya, lebih dua pertiga hospital tidak berfungsi kerana kekurangan bahan api, air dan perubatan atau rosak teruk akibat serangan, lapor Bernama yang memetik Agensi Berita Iran.

## Hanya segelintir polis terlibat jenayah

**SHAH ALAM** - Hanya segelintir pegawai dan anggota polis terlibat dengan pelakuan jenayah, kata Ketua Polis Negara Tan Sri Razarudin Husain.

Menegaskan pihaknya tidak berkompromi dalam kes sedemikian, beliau berharap orang ramai tidak bimbang sebaliknya terus memberi kepercayaan kepada pasukan itu, lapor Bernama.

"Dalam 137,000 keanggotaan polis, tidak sampai dua peratus pun polis melakukan kesalahan tatatertib atau terlibat jenayah kerana mereka ini diselia pegawai atasan," katanya.

Beliau mengulas penahanan dua anggota berpangkat konstabel dan lans koperal yang disyaki terlibat dalam kes saman dan rogol penuntut kolej swasta di Ampang pada 9 Januari.

## Jualan Agro Madani dapat sambutan

**SHAH ALAM** - Lembaga Pemasaran Pertanian Persekutuan (Fama) menyasarkan nilai jualan RM57.5 juta dalam Jualan Agro Madani 2024 meliputi 5,000 lokasi seluruh negara tahun ini.

Pengerusinya Aminuddin Zulkifli berkata program berkenaan dijangka memberi manfaat kepada 7.2 juta isi rumah hasil penjimatan dianggar RM77.25 juta, lapor Bernama.

Beliau menjelaskan pihaknya menyasar jualan sekitar RM50 juta pada tahun lalu tetapi mereka mencapai hampir RM100 juta.

Sepanjang tahun lalu, program meliputi 5,271 lokasi di seluruh negara mencatat nilai jualan RM90.8 juta yang membawa penjimatan RM27.2 juta kepada 10.5 juta isi rumah.

## OKU nikmati tambang percuma

**SHAH ALAM** - Golongan orang kurang upaya (OKU) menikmati tambang percuma semula perkhidmatan rel dan bas kendalian Prasarana Malaysia Berhad (Prasarana) mulai Februari.

Ia berikutan Prasarana Malaysia Berhad (Prasarana) memperkenal pas langganan OKU Smile mulai 16 Januari untuk pemegang kad konsesi OKU Prasarana sedia ada dan pemohon baharu.

Kemudahan itu susulan pengumuman Menteri Pengangkutan Anthony Loke pada 21 Disember mengenai insentif untuk masyarakat OKU bagi semua perkhidmatan kendalian Prasarana, lapor Bernama.

Maklumat berkaitan pas OKU Smile boleh didapati menerusi laman sesawang www.myrapid.com.my atau di platform media sosial Rapid KL, Rapid Penang dan Rapid Kuantan.

Pengguna juga boleh menghubungi talian khidmat pelanggan Rapid KL 03-78852585; Rapid Penang 04-255 8000 atau Rapid Kuantan 09-5663686/019-3858607.

## RM16 juta kompaun kesalahan tembakau

**SHAH ALAM** - Sebanyak 112,455 notis dikeluarkan kerana melanggar Peraturan-Peraturan Kawalan Hasil Tembakau 2004 sepanjang tahun lalu hasil kunjungan ke 246,982 premis.

"Sebanyak 63,039 kompaun ditawarkan dengan nilai tawaran lebih RM16 juta," kata Ketua Pengarah Kesihatan Datuk Dr Muhammad Radzi Abu Hassan seperti dilapor Bernama.

Selain itu, beliau dalam kenyataan pada 16 Januari berkata 36,426 kompaun bernilai lebih RM18 juta dikeluarkan dalam tempoh sama bagi pencegahan dan kawalan penyakit demam denggi.

Sebanyak 4,264 kes didaftar untuk tindakan mahkamah manakala 911 kes disabitkan kesalahan dan denda RM2,349,950.

## Sedia pakej Rahmah tunai haji

**SHAH ALAM** - Semua 25 syarikat pengelola jemaah haji meneruskan tawaran pakej Rahmah pada harga bawah RM50,000 untuk tahun ini, kata pengarah eksekutif haji Lembaga Tabung Haji (TH).

Datuk Seri Syed Saleh Syed Abdul Rahman berkata mereka memberi jaminan menyediakan pakej itu kepada bakal jemaah yang memilih tidak menunaikan ibadat haji menerusi pakej Muassasah TH.

Beliau juga menjelaskan TH meminta

semua syarikat berkenaan menyediakan pakej Rahmah seperti tahun lalu dan seruan tersebut mendapat sambutan baik, lapor Bernama.

"Bakal jemaah yang pilih untuk menunaikan haji menerusi syarikat tersebut hanya perlu tambah sedikit sahaja, dapat pergi melalui pakej Rahmah," katanya di ibu negara pada 15 Januari.

Dalam sidang media prapelancaran Karnival Haji, Umrah dan Pelancongan

2024, Syed Saleh juga mengingatkan bakal jemaah memilih pakej 25 syarikat itu agar tidak menjadi mangsa penipuan.

"Kita tidak mahu ada bakal haji yang diperdaya atau menerima perkhidmatan yang kurang daripada apa yang mereka janjikan."

"TH menilai syarikat yang mempunyai kewibawaan, kewangan yang kukuh serta pengurusan dan pengalaman yang baik sebelum memilih mereka," katanya.

## Pacu pertumbuhan AI

# Pintu gerbang syarikat pemula

Oleh **SOFIA NASIR**

**SUBANG JAYA** - Kerajaan akan memperkenal aspirasi KL20 untuk membawa negara ke dalam kelompok 20 teratas dunia sebagai hab inovasi dan syarikat pemula menjelang 2030.

Menteri Ekonomi Rafizi Ramli berkata inisiatif yang akan dilancar pada Mac menjadikan Malaysia sebagai medan ujian dan pintu gerbang ASEAN serta seluruh dunia.

Beliau menjelaskan inisiatif itu meliputi pembangunan Tetingkap Tunggal



Syarikat Pemula atau Startup Single Window melalui peruntukan RM28 juta seperti yang diumum dalam Belanjawan 2024.

Katanya, tetingkap tersebut mengumpulkan syarikat pemula, pelabur dan syarikat modal teroka serta agensi kerajaan ke dalam satu platform bagi mengupayakan keputusan bersandarkan data.

"Paling penting, ketersediaan bakat tempatan untuk memacu pertumbuhan teknologi AI negara. Usaha giat dijalankan untuk meningkatkan kemahiran digital masyarakat."

"Kita akan kenal pasti cabaran dan peluang dalam landskap bakat digital

dan menambah baik kurikulum pendidikan sekolah. Ini boleh dilaksana menerusi AI Untuk Rakyat," katanya.

Beliau berucap dalam pelancaran portal Kecerdasan buatan (AI) Untuk Rakyat di Universiti Putra Malaysia (UPM) yang dirasmikan Perdana Menteri Datuk Seri Anwar Ibrahim.

Rafizi mengakui hasrat kerajaan itu suatu cita-cita yang tinggi tetapi bukan mustahil untuk dicapai, bahkan hala tuju KL20 titik tolak ke arah matlamat tersebut.

"Dokumen KL20 yang akan dilancarkan bakal menggariskan reformasi inisiatif tersasar untuk membangunkan ekosistem inovasi dan syarikat pemula yang teguh dan mampan," katanya.

## Rapat jurang digital masyarakat

**SERDANG** - Portal percuma dalam talian yang dibangunkan bagi mempelajari teknologi kecerdasan buatan (AI) bertujuan merapatkan jurang literasi digital masyarakat, kata menteri ekonomi.

Rafizi Ramli berkata program ini membantu orang ramai memahami teknologi itu seterusnya membawa manfaat besar kepada semua baik secara individu, masyarakat dan negara.

"Bagi pelajar, ia memberi gambaran

atas tentang dunia AI yang bertujuan menarik minat mereka untuk menceburi dan seterusnya membina kerjaya dalam sektor ini," katanya.

Beliau berucap dalam majlis pelancaran program berkenaan di Universiti Putra Malaysia di sini yang dirasmikan Perdana Menteri Datuk Seri Anwar Ibrahim pada 15 Januari.

Rafizi menambah menyatakan sekurang-kurangnya sejuta rakyat memanfaatkan portal tersebut dalam tem-

poh tiga tahun akan datang, sekali gus membina ekonomi digital lebih baik.

Katanya, teknologi AI berupaya membuka kapasiti produktif bernilai USD113.4 bilion, bersamaan satu perempat daripada Keluaran Dalam Negara Kasar (KDNK) negara pada 2022.

"Dengan memanfaatkan peluang ini, kita mampu membina ekonomi digital yang kalis masa hadapan dan membolehkan Malaysia menjana nilai lebih tinggi di persada dunia," katanya.

## sen

memberi bantuan bersasar kepada pengguna termasuk rebat kepada golongan berpendapatan rendah bagi meminimumkan kesan kenaikan tarif.

Mereka juga perlu membangunkan prasarana sistem bekalan termasuk membina dan menaik taraf loji rawatan air, mengganti paip usang, penyenggaran berkala serta menangani aduan dengan cekap.

## Tarif air naik purata 22 sen

**SHAH ALAM** - Tarif air naik purata 22 sen setiap meter padu membabitkan pengguna domestik di semenanjung dan Wilayah Persekutuan Labuan mulai 1 Februari.

Menurut Suruhanjaya Perkhidmatan Air Negara (SPAN), pelarasan itu tidak boleh ditangguh berikutan ia boleh memberi kesan terhadap mutu perkhidmatan bekalan air.

"Kenaikan ini masih rendah dan tidak

dapat menampung kos sebenar penyediaan perkhidmatan bekalan air RM1.75 bagi setiap meter padu berdasarkan rekod 2022," kata kenyataan tersebut.

Mengikut SPAN, pelaksanaan itu berdasarkan keperluan pentadbiran negeri dan pihaknya sentiasa memantau bagi memastikan perkhidmatan air ditambah baik selaras kenaikan tarif.

Operator setiap negeri juga disaran



**BIMBING...** Anggota Angkatan Pertahanan Awam menunjukkan cara mengendali gergaji rantai kepada pengunjung Shah Alam Hari Tanpa Kenderaan di hadapan Wisma Majlis Bandaraya Shah Alam pada 14 Januari. Foto MBSA

Sasar 250,000 daftar aplikasi buang sampah

# i-Clean selesai 98 peratus aduan

Oleh SITI ROHAIZAH ZAINAL

**SHAH ALAM** - KDEB Waste Management (KDEBWM) menyasar 250,000 pengguna mendaftar aplikasi aduan pembuangan sampah, i-Clean Selangor pada tahun ini.

Pengarah Urusannya Dato' Ramli Mohd Tahir menjelaskan seramai 150,000 pengguna mendaftar aplikasi dalam talian yang dibangunkan sejak 2016.

"Hampir 98 peratus aduan diterima di aplikasi ini diselesaikan dalam tempoh ditetapkan seperti kutipan sampah 12 jam manakala pembersihan awam kurang dari 48 jam.

## MPHS sita, tunda kenderaan terbiar

**SHAH ALAM** - Majlis Perbandaran Hulu Selangor (MPHS) menyita dan menunda mana-mana kenderaan yang didapati tersadi di kawasan perumahan, perniagaan serta perindustrian daerah ini.

Yang Dipertua Mohd Hasry Nor Mohd menjelaskan tindakan berkenaan bertujuan mengelak persekitaran tidak selamat termasuk isu kesihatan dan kakau ganggu penglihatan.

Beliau menjelaskan sebanyak 65 kenderaan tersadi dengan 85 peratus daripadanya terletak di kawasan per-

"Tahun ini, kita sasar daftar 100,000 pengguna. Sebenarnya aplikasi ini memudahkan pengguna untuk menghantar sebarang aduan terutama berkaitan kutipan sampah," katanya pada 12 Januari.

Beliau menambah KDEBWM bekerjasama dengan pihak berkuasa tempatan, Ahli Dewan Negeri dan ahli parlimen bagi memudahkan pendaftaran.

Dalam perkembangan lain, Ramli memaklumkan KDEBWM mahu mempertingkat prestasi dengan menambah luas cakupan bidang perniagaannya pada tahun ini.

"Tahun ini kita dapat kelulusan menguruskan sisa industri di Majlis Perbandaran Selayang berbanding sebelum

ini hanya di Majlis Perbandaran Kuala Langat dan Majlis Perbandaran Kuala Selangor.

"Selain itu, kita menyambung kontrak selama tujuh tahun bersama Majlis Perbandaran Selayang dan Majlis Perbandaran Ampang Jaya untuk kutipan sampah domestik," katanya.

Tahun lalu, aplikasi i-Clean Selangor diiktiraf Aplikasi Perkhidmatan Awam Terbaik sempena majlis Anugerah PC.Com edisi ke-23.

Muat turun aplikasi itu di Google Play Store dan App Store selain hubungi khidmat pelanggan di talian 1-800-88-2824/019-375 9592 atau WhatsApp (019-2742824) untuk laporkan sebarang aduan.

mahan, perniagaan dan perindustrian ditunda sepanjang tahun lalu.

"Berdasarkan rekod, hampir 85 peratus gagal disampaikan daripada 65 notis peringatan yang dikeluarkan kepada pemilik kenderaan," katanya pada 14 Januari.

Beliau juga menjelaskan MPHS menghantar notis peringatan sebaik menerima maklumat Jabatan Pengangkutan Jalan sebelum operasi tunda dilanjutkan.

"Semakan lanjut di institusi kewangan berdaftar dan polis turut dibuat

untuk memastikan sama ada kenderaan itu ada rekod pinjaman atau terlibat kes jenayah.

"Jika tiada tuntutan mana-mana pihak selepas tempoh notis tamat, MPHS siarkan iklan mengandungi senarai kenderaan di media massa dan laman sesawang rasmi jabatan," katanya.

Mohd Hasry berkata pemilik kenderaan diberi 14 hari daripada tarikh siaran iklan bagi membuat tuntutan dengan membawa salinan kad pengenalan, geran hak milik serta membayar semua kos.

## Naik beca ronda Kuala Kubu Baharu

**SHAH ALAM** - Orang ramai berpeluang menikmati keindahan sekitar bandar Kuala Kubu Baharu dengan menaiki beca dan basikal rekreasi pintar yang disediakan Majlis Perbandaran Hulu Selangor (MPHS).

Perkhidmatan yang masih dalam tempoh percubaan itu antara inisiatif untuk mempromosi pelancongan di daerah berkenaan selain persiapan menyambut Tahun Melawat Selangor 2025.

"Perkhidmatan dengan kerjasama Cy-cledios Management Sdn Bhd bertujuan mempelbagaikan kegiatan pelancongan sekali gus menarik minat pelancong datang ke Hulu Selangor," kata kenyataan.

Cadangan laluan beca dalam fasa pertama dibuat sekitar Bandar Kuala Kubu Baharu sementara laluan lain dibuka pada fasa seterusnya jika kegiatan berkenaan mendapat sambutan menggalakkan.

## 370 permit niaga sempena Ramadan

**SHAH ALAM** - Majlis Daerah Sabak Bernam (MDSB) membuka permohonan tapak bazar Ramadan secara dalam talian membabitkan 370 permit bagi lokasi di Sekinchan, Sungai Besar, Sabak dan Parit Baru sehingga 23 Februari.

Pemohon mesti berusia 18 tahun ke atas, sihat tubuh badan, tiada penyakit berjangkit dan melampir salinan kad pengenalan, sijil suntikan antitifoid dan sijil kursus pengendalian makanan.

Pemulangan borang permohonan dibuat mengikut zon iaitu Sekinchan pada 30 hingga 31 Januari diikuti Sungai Besar (5-7 Februari), Sabak (14-16 Februari) dan Parit Baru (19-23 Februari).

Pertanyaan lanjut layar [www.mdsb.gov.my/images//e-borang/jabatan-pelesenan/PERMOHONAN%20BAZAR%20RAMADAN%202024%201.pdf](http://www.mdsb.gov.my/images//e-borang/jabatan-pelesenan/PERMOHONAN%20BAZAR%20RAMADAN%202024%201.pdf) atau hubungi Jabatan Pelesenan 03-3224 1655 sambungan 144/145 (waktu pejabat).

## Sasar kutip RM530 juta cukai

**SHAH ALAM** - Majlis Bandaraya Shah Alam (MBSA) menyasar kutipan cukai RM530 juta pada tahun ini berbanding pungutan RM505 juta sepanjang tahun sebelumnya.

Pemangku Datuk Bandar Cheremi Tarman menjelaskan sasaran kutipan berkenaan meningkat sedikit dan merangkumi hasil cukai taksiran serta lain-lain.

"Sasaran kutipan cukai meningkat berikut tahun lalu mengutip 96 peratus pembayar cukai dengan nilai RM310 juta," katanya dalam Program Shah Alam Hari Tanpa Kenderaan pada 14 Januari.

Beliau berharap pembayar cukai menjalankan tanggungjawab dengan membayar mengikut tempoh, malah pelbagai hadiah ditawarkan MBSA kepada mereka.

## Mohon sijil halal buffet Ramadan

**SHAH ALAM** - Pengusaha hotel, restoran dan kedai makan yang berhasrat menyediakan perkhidmatan buffet Ramadan di galakkan memohon Sijil Pengesahan Halal Malaysia (SPHM).

Menurut Jabatan Agama Islam Selangor (Jais) di Facebook pada 10 Januari, permohonan SPHM boleh dibuat di laman sawang shorturl.at/cCFJ5

Mengikut Akta Perintah Perihal Daganan (Perakuan dan Penandaan Halal) 2011 pengusaha yang mengiklan makanan halal tanpa memiliki SPHM boleh dikenakan denda sehingga RM200,000.

Sebarang pertanyaan hubungi Bahagian Pengurusan Halal Jais melalui talian 03-55143760/3486 atau e-mel ke unitpennguatusaanhala@jais.gov.my.

## Kerjasama bangun potensi mualaf

**SHAH ALAM** - Universiti Islam Selangor (UIS) memeterai memorandum perjanjian (MOA) berkait kerjasama penyelidikan bagi membangun potensi mualaf sebagai pendakwah.

Menurut Unit Komunikasi Korporatnya, MOA bersama Pertubuhan Kebajikan Islam Malaysia (Perkim) bagi penyelidikan bertajuk Pembangunan Model Pembentukan Mualaf Profesional Sebagai Pendakwah.

Kenyataan pada 12 Januari menyebut kerjasama tersebut berkait penyelidikan, penulisan ilmiah, penerbitan, seminar dan wacana untuk membangun mualaf sebagai pendakwah.

"Kajian itu bakal merangka pendekatan praktikal yang menjadi panduan mendekati golongan mualaf profesional untuk berperanan sebagai pendakwah terutama dalam kalangan mereka," katanya.

Memorandum ditandatangani Timbalan Naib Canselor Penyelidikan Jaringan Komuniti dan Industri UIS Prof Madya Dr Mokmin Basri dan Setiausaha Agung Kehormat Perkim Tan Sri Dr Mohd Yusof Noor.

## Sumbangan tunai mangsa kebakaran

**SHAH ALAM** - Yayasan Islam Darul Ehsan (Yide) menghulur sumbangan tunai keemasan kepada mangsa kebakaran di Kampung Perigi Nenas, Klang pada 10 Januari.

Pemangku Pengurus Operasi Bahagian Kebajikan Yide Muhammad Zubair Azizan juga menyerahkan Pek Kasih Yide mengandungi barang keperluan harian bagi meringankan beban keluarga berkenaan.

"Yide menzahirkan ucapan terima kasih kepada semua penyumbang yang menyalur infak dana musibah," kata kenyataan tersebut.

Kebakaran pada 7 Januari itu dipercayai akibat litar pintas. Beberapa barang dan perabot milik mangsa musnah. Bagaimanapun, tiada kemalangan jiwa berlaku.

## STDC kerjasama dengan industri

**HULU LANGAT** - Pusat Pembangunan Kemahiran Teknikal Selangor (STDC) sedia melebarkan kerjasama dengan lebih banyak penggiat industri bagi penawaran kursus jangka pendek untuk pelatihnya.

Ketua pegawai eksekutifnya berkata usaha itu antara fokus tahun ini bagi melengkapkan pelatih dengan pelbagai latihan kemahiran bermutu sekali gus menjamin kebolehpasaran pekerjaan.

"Sejak tahun lalu, kita laksana kursus jangka pendek yang dipanggil 'place and train' dengan pihak industri

yang menjamin penempatan pekerjaan selepas pelajar selesai menjalani kursus.

"Memandangkan konsep ini disambut baik oleh banyak industri, kita akan perkasa lagi tahun ini dan memperbanyak pengambilan pelajar," kata Mohd Ramali Abu Bakar.

Beliau meninjau kerja pemasangan lampu dan pendawaian elektrik sumbangan Menteri Besar Selangor (Pemerbadanan) di Blok C, Panggupuri Seri Rinching, Semenyih pada 10 Januari.



Katanya, 500 pelatih disasar mengikut program kemahiran meliputi kursus antaranya teknologi automotif, teknologi motosikal, teknologi elektrik dan teknologi sistem komputer.

"Selain itu teknologi penyaman udara, pastri dan kulinari dengan kemudahan asrama disediakan untuk pelatih," katanya sambil menambah ada empat sesi pengambilan pada tahun ini.

STDC adalah institusi pendidikan teknikal bawah Kerajaan Negeri yang menawarkan pelbagai latihan kemahiran berkualiti dan berdampak tinggi ke arah Revolusi Industri 4.0.

### Panggupuri kembali ceria

## Ganti lampu, baiki pendawaian elektrik

Oleh SUHAILA SHAHRUL ANNUAR

**HULU LANGAT** - Menteri Besar Selangor (Pemerbadanan) atau MBI memperuntuk RM13,000 bagi penggantian lampu dan pendawaian semula elektrik di sebuah panggupuri di Semenyih.

Ketua Jabatan Tanggungjawab Sosial dan Komunikasi Korporatnya berkata pihaknya bekerjasama dengan Pusat Pembangunan Kemahiran Teknikal Selangor (STDC) dalam penyediaan tenaga kerja.

"Dalam tiga hari, kira-kira 80 lampu jenis LED (lampu diod pemancar cahaya)

dipasang, pendawaian baharu dan semakan kotak agihan (DB) dibuat bagi memastikannya berfungsi membabitkan kos keseluruhan kira-kira RM13,000.

"Menerusi kerjasama ini, kita jimat kira-kira RM5,000 berbanding sebut harga yang diberi kontaktor," kata Ahmad Azri Zainal Nor ketika meninjau kerja pemasangan di Panggupuri Seri Rinching pada 10 Januari.

Beliau menambah usaha itu akan dijadikan modul untuk penyaluran bantuan berkaitan di tempat lain selepas mengambil kira kejayaannya menjimatkan kos selain mengasah kemahiran pelatih.

Sementara itu, ketua pegawai eksekutif STDC berkata program itu melibatkan lima pengajar dan 10 pelatih kursus pemasangan dan penyelenggaraan elektrik tahap dua.

"Program ini memberikan peluang kepada pelajar mengaplikasikan ilmu yang dipelajari dalam kelas kepada praktikal," kata Mohd Ramali Abu Bakar.

Sementara itu, pengurus badan pengurusan Rosmi Mohd Yusof bersama panggupuri bersyukur kawasan itu akhirnya kembali diterangi cahaya lampu setelah hampir lapan tahun bergelap.

## RM40,000 bina tapak perhimpunan

**SHAH ALAM** - Perbadanan Wakaf Selangor (PWS) menyerahkan sumbangan RM40,000 kepada Sekolah Agama Rakyat (SAR) Kafa Integrasi Darussalim di Sijangkang, Kuala Langat.

Menurut kenyataan PWS, sumbangan wakaf fisabilillah itu bertujuan membina tapak perhimpunan berbumbung dan lantai konkrit untuk manfaat warga sekolah berkenaan.

"Serahan cek cura disempurnakan Pengurus Bahagian Korporat PWS Muhammad Hafiz Bahari dan Ketua Guru SAR Kafa Integrasi Darussalim Heryanti Saharudin.

"Sesi penerangan wakaf tunai turut disampaikan Ibnu Hubain Abdul Aziz selaku Eksekutif Unit Kutipan dan Agihan di Bahagian Korporat PWS kepada semua guru sekolah tersebut," katanya.

## Peluang ikuti program aeroangkasa

**SHAH ALAM** - Permohonan mengikut kursus kejuruteraan teknikal dalam Program Perantisan Aeroangkasa Selangor 2024 dibuka hingga 24 Januari.

Menteri Besar Selangor (Pemerbadanan) atau MBI memaklumkan penawaran pengambilan segera itu bagi sesi April.

Katanya program 24 bulan dengan kerjasama syarikat aeroangkasa GE Engine Services Malaysia Sdn Bhd (GE Ma-

laysia) itu bagi meningkatkan ketersempurnaan bakat industri sekali gus menjamin kebolehpasaran pekerjaan.

"Ini berita baik untuk rakyat Selangor. Bagi yang layak mohon segera dan jangan lepaskan peluang ini," katanya menerusi Facebook pada 12 Januari.

Kelebihan program itu antaranya peluang kerja dengan GE Malaysia, pendedahan kepada industri aeroangkasa, bimbingan pakar industri selain eluan

Penubuhan PWS yang juga anak syarikat Majlis Agama Islam Selangor (Mais) diwartakan pada 11 Januari 2011 hasil buah fikiran Duli Yang Maha Mulia Sultan Selangor.

Pada 2009, Sultan Sharafuddin Idris Shah bertitah supaya Mais menubuhkan PWS agar pengurusan wakaf dapat diperkasa seperti pengurusan zakat.

disediakan tertakluk terma dan syarat.

Syarat kelayakan termasuklah pemohon dan ibu bapa warganegara Malaysia, lahir dan menetap di Selangor sekurang-kurangnya 11 tahun.

Selain itu, pemohon memiliki sekurang-kurangnya ijazah sarjana muda kejuruteraan dalam bidang mekanikal, aeroangkasa, perindustrian atau pembuatan dengan CGPA minimum 3.5 atau lebih.



**SEMANGAT...** Pemain ragbi wanita menjalani ujian kecergasan di Kelab Ragbi Cobra, Petaling Jaya pada 13 Januari. Foto Facebook Majlis Sukan Negeri Selangor

Pembangunan semula Stadium Shah Alam

# Proses alih stesen tenaga elektrik

Oleh NORRASYIDAH ARSHAD

**SHAH ALAM** - Kerja pembangunan semula Kompleks Sukan Shah Alam (KSSA) dilakukan sebaik sahaja stesen Tenaga Nasional Berhad (TNB) dialih.

Dato' Menteri Besar berkata ketika ini proses pengalihan stesen yang menyalur tenaga elektrik kepada semua pengguna sekitar Seksyen 13 sedang berjalan.

"Kalau tidak ubah, seluruh Seksyen

13 akan bergelap. Langkah ini lebih baik berbanding membina stesen TNB baru yang mengambil masa lama dan perobohan (hanya) dapat dibuat dalam tempoh setahun lagi.

"Selaras alih, kita akan teruskan proses roboh. Majlis Bandaraya Shah Alam sudah beri kebenaran," kata Dato' Seri Amirudin Shari pada 15 Januari.

Ditemui pada majlis Amanat Tahun Baharu 2024, beliau berkata proses perobohan menggunakan kaedah manual, bukan penggunaan bom peledak.

## Usaha layak ke Olimpik Paris

**SHAH ALAM** - Atlet bawah program podium perlu menjadikan pengumuman eluan bulanan yang ditukar kepada gaji oleh Kementerian Belia dan Sukan (KBS) sebagai pembakar semangat untuk mereka layak ke Sukan Olimpik Paris 2024.

Menteri Belia dan Sukan Hannah Yeoh berkata pihaknya telah menuaikan hasrat atlet berhubung perkara tersebut dan justeru, sudah tiba masa mereka berusaha sehabis mungkin bagi melayakkan diri ke temasya sukan paling berprestij itu.

"Kita mahu atlet podium bukan sahaja badminton kerana mereka sekarang ini akan tandatangan untuk menerima gaji... jadi atlet kena lihat bahawa latihan sahaja tidak cukup kerana rakyat Malaysia mendoakan mereka serta mahu lihat hasilnya," katanya seperti dilapor Bernama pada 14 Januari.

Beliau berkata hanya berbaki beberapa bulan untuk atlet terbabit ke Paris bagi menyertai kejohanan yang berlangsung pada 27 Julai hingga 12 Ogos.

"Saya mahu mereka pastikan dapat layak dan ambil serius berhubung per-

"Kita gunakan mesin. Jika guna bom peledak, akan beri kesan kepada kejiranan di sekitar stadium. Jadi proses ambil masa kerana banyak kerja dilakukan," katanya.

Kerajaan Negeri bakal membina kompleks sukan baharu bagi menggantikan kemudahan sedia ada di Seksyen 13 yang rosak akibat banjir mulai 2006.

Projek KSSA atas tanah seluas lebih 80 hektar meliputi pembinaan hotel, stesen perkhidmatan awam bersepadu, pusat teater dan kawasan komersial.

kara ini. Bukan semua dapat peluang ini dan belum tentu ada peluang kedua buat mereka pada temasya Sukan Olimpik 2028 di Los Angeles," katanya.

Pada 11 Januari, KBS mengumumkan bayaran eluan bulanan atlet di bawah Program Podium ditukar kepada gaji dan akan dinaikkan dengan minimum asas sebanyak RM1,500 sebulan.

Seramai 307 atlet dan 86 atlet para di bawah program itu menerima caruman Kumpulan Wang Simpanan Pekerja serta Pertubuhan Keselamatan Sosial.

## KDEB FC juara Piala Amirudin

**SHAH ALAM** - KDEB FC menjuarai Liga Super Gombak Piala Amirudin Shari 2023 selepas menewaskan Kampung Jawa Brothers FC 2-0 dalam perlawan akhir di Stadium Majlis Perbandaran Selayang pada 13 Januari.

Kedua-dua gol KDEB FC dijaringkan Muhammad Adli Zulgaflie pada minit ke-17 dan Muhammad Ridzuan Azly Hussam minit ke-27.

Bloodbrothers FC ketiga selepas menevasan RPBC FC 5-4 menerusi penentuan separaan penalti. Kedua-dua pasukan sebelum itu terikat 2-2.

Selaku juara, KDEB FC membawa pulang wang tunai RM3,000 berserta trofi manakala Kampung Jawa Brothers (RM1,500 dan pingat), Bloodbrothers FC (RM750 dan pingat) dan RPBC FC (pingat).

## Atlet para pertama raih pingat

**SHAH ALAM** - Atlet berbasikal para negara Mohamad Yusof Hafizi Shaharuddin mencipta kejutan merangkul pingat gangsa Piala Dunia Berbasikal Para Lebuh Raya di Adelaide, Australia.

Kejayaan pada 15 Januari itu menyaksikan beliau menjadi atlet berbasikal para pertama yang meraih pingat dalam kejohanan berprestij berkenaan, lapor Bernama.

Mohamad Yusof mempamerkan kayuhan bertenaga dalam acara ujian masa lebuh raya dengan merakam masa 21 minit 33.17 saat (s) untuk memperoleh tempat ketiga.

Pingat emas milik pelumba Sepanyol Ricardo Ten Argiles yang mencatat masa 21.32.27s dan pingat perak disambar wakil Jerman Pierre Senska selepas melakar 21.32.27s.

## Tangguh latihan sehingga Ogos

**SHAH ALAM** - Jaguh 400 meter negara terpaksa menangguhan latihan dan pelajarannya di Universiti Auburn, Amerika Syarikat sehingga Ogos depan.

Menurut Umar Osman, masalah teknikal di pihak Persatuan Olahraga Kolej Kebangsaan (NCAA) yang terlewat dua hari mengurusan permohonannya menyebabkan beliau tidak dapat menyertai rakan senegara, Muhammad Azeem Fahmi.

"Saya baru dapat tahu daripada jurulatih Azeem, Ken Harnden yang saya terpaksa ke Amerika Syarikat pada Ogos kerana untuk Januari, sudah tidak sempat kerana NCAA luluskan (permohonan) saya lambat dua hari."

"Universiti di Amerika Syarikat, kalau lambat masuk dalam tempoh pengajian itu, memang tidak dibenarkan masuk. Jadi perlu masuk untuk pengambilan kedua pada Ogos nanti," katanya lapor Berita Harian pada 15 Januari.

**MOHD KAMRI KAMARUDDIN**  
**Bukit Antarabangsa**

melayan pengunjung di  
Pusat Khidmat Masyarakat  
DUN beliau

**DATUK RIZAM ISMAIL****Sungai Air Tawar**

menghadiri taklimat  
inisiatif Kerajaan  
Negeri di DUN beliau

**DR FAHMI NGAH**  
**Seri Setia**

memberi kalender dan  
baucar Jom Shopping  
di pejabat DUN beliau

**LIM YI WEI**  
**Bukit Tunku**

mengagih baucar belanja  
di pusat khidmat  
DUN beliau

**MARIAM ABDUL RASHID**  
**Meru**

menyerah beg dan alatan  
sekolah kepada penerima  
Tawas di DUN beliau

**YEW JIA HAUR****Teratai**

menyempurnakan majlis  
graduasi tadika  
di Ampang Jaya.

**SYED AHMAD ALHADAD**  
**Lembah Jaya**

menyumbang kerusi roda di  
Kampung Dato' Mufti Shuib,  
Ampang Jaya

**DANIAL AL-RASHID**  
**Batu Tiga**

bersama pelajar dalam  
program Pecutan Terakhir  
SPM di Shah Alam

# 1,000 terima bantuan sekolah

**SHAH ALAM** - Sebanyak 800 bantuan diagih kepada keluarga berpendapatan rendah sekitar Dewan Undangan Negeri Seri Serdang sempena sesi persekolahan akan datang.

Wakil rakyatnya Abbas Azmi berkata bantuan kepada 600 ahli Tabung Warisan Anak Selangor (Tawas) yang memasuki darjah satu manakala selebihnya sumbangan



Menteri Besar Selangor (Pemerbadanan) atau MBI.

"Ini inisiatif Kerajaan Negeri kepada golongan sasar dalam mengurangkan beban belanja untuk kelengkapan persekolahan. Bantuan ini akan diagih berperingkat," katanya pada 13 Januari.

Yayasan Warisan Anak Selangor (Ywas) menyediakan beg sekolah, kelengkapan alat tulis, bekas makanan dan

tabung kepada 36,326 ahli Tawas menerusi Program Bantuan Masuk Sekolah.

Selain itu, Abbas menambah seramai 400 keluarga B40 turut menerima baucar Jom Shopping Raya bernilai RM200 sempena perayaan Tahun Baharu Cina pada bulan depan.

"Kita masih mengenal pasti penerima layak. Agihan dibuat secepat mungkin supaya mereka dapat menyediakan keperluan raya dan berbelanja di Pasar Raya Giant Seri Kembangan," katanya.

**Penerima harap bantuan ditambah baik**

# Baucar tampung belanja dapur

Oleh FITRI HAZIM HAZAM

**AMPANG JAYA** - Golongan warga emas yang menerima baucar beli-belah bersyukur menerima bantuan itu dan menggunakan untuk membeli barang dapur.

Mohd Yatim Simin, 81, berkata baucar Jom Shopping bernilai RM150 bermanfaat kepadanya apatah lagi tidak bekerja dan tiada pendapatan tetap.

"Baucar akan digunakan untuk memberi barang dapur untuk menampung keperluan saya, isteri dan seorang anak, saya ucapkan terima kasih kepada Ker-

jaan Negeri," katanya.

Beliau antara penerima 1,500 baucar Skim Mesra Usia Emas (SMUE) dan Skim Mesra Insan Istimewa (SMIS) yang diagih Penyelaras Pejabat Dewan Undangan Negeri Hulu Kelang Juwairiya Zulkifli di pusat beli-belah Giant Taman Permata pada 13 Januari.

Bagi Mariathaeresa Kumar, 62, pemberian baucar itu membantu perbelanjaan keluarganya dalam tempoh seminggu.

"Saya bersyukur meskipun nilainya hanya RM150 tetapi ia amat besar ertiannya kepada saya. Saya harap inisiatif ini akan diteruskan serta ditambah baik pada

masa depan bagi memperluaskan penerima manfaat.

Seorang lagi warga emas Choe Bee Bee, 70, berkata sumbangan itu digunakan untuk membeli makanan dan minuman bagi menyambut perayaan bersama keluarga.

"Saya akan guna baucar bernilai RM150 untuk beri barang dapur seperti beras dan minyak masak di pasar raya berdekatan rumah," katanya.

SMUE diperkenalkan lebih sedekad lalu bagi menghargai warga emas negeri ini dengan setiap ahli menerima baucar sempena ulang tahun kelahiran serta khairat kematian.

# Sumbangan untuk 1,500 warga emas

**AMPANG JAYA** - Penyelaras Pejabat Dewan Undangan Negeri Hulu Kelang mengagih 1,500 baucar Jom Shopping kepada peserta Skim Mesra Usia Emas (SMUE) dan Skim Mesra Insan Istimewa (SMIS).

Juwairiya Zulkifli berkata kaunter bergerak disediakan dengan kerjasama Yayasan Warisan Anak Selangor di pusat beli-belah Giant Taman Permata di sini bagi memudahkan penerima mengambil baucar.

"Sambutan luar biasa warga emas yang teruja untuk menebus baucar mereka setelah mendaftar susulan pengumuman Dato' Menteri Besar menaikkan nilai baucar dari RM100 hingga RM150.

"Dalam tempoh kurang sejam, 400 orang mengambil nombor yang menunggu sejak pagi," katanya pada 13 Januari.

Beliau menambah pihaknya turut membuka kaunter penilaian baucar Jom Shopping bernilai RM200 sempena Tahun Baharu Cina dengan sasaran 400 pemohon.

"Ramai mendaftar dan saya berharap warga Hulu Kelang gembira dengan inisiatif Kerajaan Negeri untuk beraya. Walaupun nilainya tidak besar tetapi ia membantu ringankan beban.



# Beri calon SPM set alat tulis

**SHAH ALAM** - Calon Sijil Pelajaran Malaysia (SPM) daripada lima sekolah menerima sumbangan set alat tulis dan kit Pencegahan Covid-19, kata Ahli Dewan Negeri Rawang Chua Wei Kiat.

Beliau menjelaskan sumbangan 1,600 set alat tulis dan 1,700 kit Pencegahan Covid-19 itu bertujuan memberi keselesaan kepada pelajar yang menduduki peperiksaan pada

30 Januari.

"Demi memastikan kemudahan dan keselesaan adik-adik (calon SPM) yang menduduki peperiksaan pada tahun ini, saya edarkan set alat tulis, pelitup muka dan alat ujian Covid-19," katanya.

Lima sekolah itu adalah Sekolah Menengah Kebangsaan (SMK) Taman Desa 1 dan 2, SMK Tuanku Abdul Rah-

man, SMK Seri Garing serta SMK Tun Perak.

Ahli Dewan Negeri Teratai Yew Jia Haur turut menyumbang pelitup muka kepada beberapa sekolah antaranya SMK Pandan Mewah dan SMK Tasek Permai.

"Saya berharap sumbangan yang disampaikan dapat membantu pelajar melindungi diri mengekang penularan Covid-19 lebih-lebih lagi pada musim peperiksaan," katanya.



# RM13,000 meriah Pesta Ponggal

**SHAH ALAM** - Dewan Undangan Negeri Kota Anggerik berbelanja RM13,000 bagi memeriahkan Pesta Ponggal yang disambut masyarakat India.

Wakil rakyatnya Najwan Halimi menjelaskan seramai 200 keluarga di kawasan tersebut menerima bantuan berbentuk periuk tanah liat dan barang makanan asas.

"Sumbangan ini untuk digunakan mereka yang bakal menyambut perayaan Pesta Ponggal. Semoga ia memberi manfaat dan memberi kegembiraan buat mereka," katanya pada 14 Januari.

Pesta Ponggal merupakan perayaan semasa musim menuai yang dirai secara meluas dan bertujuan memberi rehat kepada pesawahan serta ternakan.

# Dana baik pulih surau, masjid

**SHAH ALAM** - Ahli Dewan Negeri Pandan Indah memberi tumpuan kepada usaha membaik pulih prasarana termasuk dewan, surau dan masjid menerusi peruntukan Projek Selangor Penyayang.

Ir Izham Hashim menjelaskan pihaknya turut memberi tumpuan penyelenggaraan dan menaik taraf prasarana awam bagi memastikan masyarakat memperoleh manfaat.

"Tahun lalu, 11 projek dibuat antaranya menaik taraf kerangka bumbung dewan komuniti, baik pulih tandas, turap jalan di klinik kesihatan, memasang sengkuap, membina pondok kawalan dan menukar atap kuil.

"Perancangan tahun ini kita akan fokus projek yang berimpak kepada masyarakat seperti naik taraf dewan, surau dan masjid," katanya pada 11 Januari.

# 100 asnaf terima bakul makanan

**SHAH ALAM** - Sebanyak RM5,000 diperuntuk wakil rakyat Kajang bagi membuat agihan bakul makanan kepada lebih 100 asnaf fakir dan miskin.

Cheong Kian Young menghulur bantuan tunai, beras, tepung, susu, sardin dan minyak masak bagi meringankan beban golongan tersebut di Surau Ar-Raudhah, Saujana Impian pada 6 Januari.

"Program edaran bakul makanan ini bukan perkara baharu dan diadakan setiap bulan dengan menyantuni pelbagai golongan yang terkesan.

"Kita juga meneruskan sumbangan lain seperti pembaikan infrastruktur demi manfaat rakyat," katanya yang berharap peruntukan ditambah berikutnya bilangan pengundi melebihi 110,000.

Sebelum ini, Kian Young mahu menambah baik beberapa kemudahan awam antaranya pembinaan klinik kesihatan awam di beberapa kawasan seperti Bandar Mahkota Cheras, Sungai Sekamat dan Sungai Kantan.

# selangorkini

## Tawar rebat cukai hingga 30 April

**SHAH ALAM** - Majlis Perbandaran Hulu Selangor (MPHS) menawarkan rebat cukai taksiran kepada pelanggan yang membayar secara dalam talian.

Menurut pihak berkuasa tempatan itu, kempen sehingga 30 April menawarkan rebat antara RM3 hingga RM6 dengan tambahan RM2 jika melanggan bil maya MPHS Pay.

Jelasnya, tawaran terbuka kepada kategori harta kediaman dengan pemilikan atas nama individu yang mempunyai tuntutan pembayaran sahaja, termasuk tunggakan jika ada.

"Pemberian rebat terhad kepada RM150,000 yang pertama. MPHS berhak meminda atau mengubah sebahagian atau semua terma dan syarat kempen tanpa notis," katanya di Facebook.

Maklumat lanjut hubungi Jabatan Perbadanan MPHS di talian 03-6064 1331 sambungan 135/151.

## Kunjungi pustaka negeri di Bangi

**SHAH ALAM** - Perpustakaan Awam Selangor@Daerah Hulu Langat di Bandar Baru Bangi dibuka semula kepada orang ramai sejak 12 Januari.

Menurut Perbadanan Perpustakaan Awam Selangor (PPAS), perpustakaan tersebut selesai dinaik taraf selain melalui proses penjenamaan bagi menarik lebih ramai pengunjung.

"Perpustakaan ini menyediakan ruang yang lebih luas dan selesa kepada pengunjung. Pelbagai kemudahan disediakan seperti sudut teknologi maklumat dan ruang kanak-kanak.

"Ia dibuka setiap hari dari 9 pagi hingga 6 petang kecuali cuti umum. Sebarang maklumat lanjut hubungi talian 03-8926 7566. Jom datang beramai-ramai," kata kenyataan di Facebook.

## RM10,000 reka bentuk hentian bas pintar

**SHAH ALAM** - Majlis Bandaraya Petaling Jaya (MBPJ) menawarkan ganjaran tunai RM10,000 dalam pertandingan reka bentuk hentian bas pintar Petaling Jaya.

Syarat penyertaan antaranya reka bentuk mempunyai konsep tersendiri mengikut komponen asas hentian bas sedia ada yang disokong teks penerangan, anggaran kos dan ada elemen pintar.

Dokumen sokongan boleh dihantar melalui e-mel [transportplanning@mbpj.gov.my](mailto:transportplanning@mbpj.gov.my) selewat-lewatnya pada 5 petang 31 Januari.

Layari [www.mbpj.gov.my/ms](http://www.mbpj.gov.my/ms) atau hubungi talian 03-7956 3544 (Muhammad Sazrul) sambungan 351 untuk maklumat lanjut.



**SETIA...** Gelagat penyokong Harimau Malaya yang menyaksikan perlawanan pertama kumpulan E Piala Asia 2023 menentang Jordan di Stadium Al Janoub, Qatar pada 15 Januari. Foto Persatuan Bolasepak Malaysia

## Rai Tahun Baharu Cina

# Sasar 100,000 sertai pesta budaya

Oleh **SITI ROHAIZAH ZAINAL**

**SHAH ALAM** - Perbadanan Teknologi Maklumat dan Ekonomi Digital Selangor (Sidec) menganjurkan Pesta Kebudayaan Balik Kampung 2024 sempena Tahun Baharu Cina selama empat hari mulai 1 Februari.

Ketua Pegawai Eksekutifnya Yong Kai Ping menjelaskan acara antara jam 10 pagi hingga 10 malam berlangsung di Pavilion Bukit Jalil, Kuala Lumpur.

Katanya, penganjuran pesta bawah program Pembangunan Usahawan

Mikro Kecil dan Sederhana (BAIK) Selangor itu hasil kerjasama EXCO Pelaburan Ng Sze Han dan EXCO Pelancongan Dato' Ng Suee Lim.

"Lebih 100 perusahaan kecil dan sederhana yang berasal dari kampung baru akan menyertai program ini dengan mempromosi dan memperkenalkan produk keluaran masing-masing.

"Pesta ini menjadi platform kepada usahawan berkongsi keistimewaan seni, keindahan alam sekitar kampung baru sekali gus membangunkan sektor perkilangan dan pembuatan serta memperkasa ekonomi masyarakat se-

tempat," katanya pada 12 Januari.

Tambah Kai Ping pihaknya menyasarkan kehadiran 100,000 pengunjung ke pesta yang dianjur sehingga 4 Februari.

"Pengunjung berpeluang merasai pelbagai citarasa makanan, mendapatkan produk bermutu tinggi, mengenali destinasi pelancongan menarik dan menyaksikan persembahan kebudayaan terunggul Selangor," katanya.

Program BAIK Selangor diperkenalkan pada Ogos 2021 bagi mengkomersialkan produk diusahakan penduduk kampung baru dan peserta turut diberi latihan berkenaan aspek pemasaran.

## Tambah 1 juta pelancong lagi

**SABAK BERNAM** - Lebih 5.6 juta pengunjung tempatan dan luar negara disaraskan melawat Selangor sepanjang tahun ini hasil pelbagai promosi menarik, kata EXCO pelancongan.

Dato' Ng Suee Lim menjelaskan sasaran itu menghampiri tambahan sejuta pelancong berbanding tahun lalu seramai 4.8 juta sebagai pecutan akhir Tahun Melawat Selangor 2025.

"Kita lihat kerja promosi yang dilakukan sebelum ini menerusi pelbagai me-

dium akan memberi dampak positif termasuk penambahan jumlah pelancong pada tahun ini," katanya pada 12 Januari.

Beliau menyertai lawatan ejen pelancongan Thailand ke sekitar Anjung Utara dari Kuala Selangor hingga Sabak Bernam selama tiga hari mulai 10 Januari.

Suee Lim menambah lokasi agro-pelancongan antaranya perkampungan buah naga di Sepang selain pusat rekreasi sekitar Kuala Kubu Bharu dira-

mal menarik lebih ramai pengunjung.

"Kita turut jangka kawasan utara Selangor akan terus mendapat perhatian tahun ini seperti Avani Sepang Gold-coast, Sepang serta beberapa pusat pelancongan di Morib," katanya.

Seramai 40 ejen pelancongan Negara Gajah Putih itu menjadi kumpulan pertama dari luar negara mengadakan lawatan ke Bukit Malawati, Pantai Redang, Sky Mirror dan Pusat Konservasi Kelip-Kelip.